

Summum Bonum:

S E U

Vera, atq; Unica Beatitudo Homi-
nibus per **CHRISTUM**
Communicanda,

Sex **DISSERTATIONIBUS**
Aliquatenus Explicata:

Per **EDMUNDUM ELISIUM**,
Ecclesiæ Anglicanæ Presbyterum.

*Multi dicunt, Quis ostendit nobis Bona?
Signatum est super nos Lumen Vultûs
tui, Domine : dedisti Latitiam in Corde
meo. Psal. 4.*

KTHMA EZ AEI.

LONDINI,

Prostant apud *Henricum Faithorne*, &
Johannem Kersey ad Insigne Rosæ in
Cœmeterio D. Pauli. 1681.

Summum Bonum:

Venerabili Fratri Bernardino Homi-
cipis per CHRISTUM
Comunicanda

DISCRETIONIS

MONASTERII CISTERCIENSIS

Sancti Bernardi Monasterii Cisterciensis
Ordinis Praedicatorum in Civitate
Romae

LETTERA

ORDINIS



ILLUSTRISSIMO
 Virtutum Omnium Exemplari
 DOMINO
 HENEAGIO FINCH,
 Baroni Daventriae,
 Summo ANGLIÆ Cancellario.

Divitias & Honores, Mul-
 torum Dominos, Tibi,
 DOMINE Colendissime, in
 Heroico Omnimodæ Virtutis Ex-
 exercitio *Inservientes* videt hæc
 Ætas, Omnis memorabit Po-
 steritas. *Ardua res hæc est Opibus*
non tradere Mores, seu potius (ut ad
 Con-

Epistola Dedicatoria.

Consuetudinem Christianam lo-
quar) SPIRITU esse PAU-
PEREM magnas inter Opes,
& splendida Ædificia ; nempe
ad Internum Te usque Splen-
dorem convertere, JUSTI-
TIÆ SOLEM in Animo
Tuo Fulgentem. Gratias ago
DEO Meo, quòd Me fecit co-
ram Hominibus tam Vilem, tam
Pusillum, tam Nullum ; Te
verò tam Excelsum, tam Con-
spicuum apud Homines, in Con-
spectu DEI tam Verè Honora-
bilem. Tu sanè Beatus es, *Bonis*
Externis Abundans, sed minimè
Intumescens : Ego etiam Beatus,
toties expertus istiusmodi *Eventa*,
quæ Mala appellantur, revera non
esse

esse *Mala*. Si quis respuerit hanc nostram Beatitudinis Explanationem, æquum putabimus istiusmodi viro non succensere, sed miserescere. Non Elati sed *Æqui Animi* est, quod Dominationi tuæ offerimus, magni æstimare.

Ut vitam Tibi in Terris longissimam summis Honoribus repletam, & tandem in cœlis Gloriam *Æternam* det ipse Fons vitæ, Rex ille Gloriæ, ex animo Precatur

Dominationi Tuae addictissimus,

E, E,

Epistle to the Romans

Paul an apostle of Jesus Christ by the will of God
to them that be called in the Gospel of Jesus Christ
an evangelist of the Son of God
Unto all that be called in the Gospel of Jesus Christ
Grace be with you and peace from God our Father
and Jesus Christ our Lord

Unto the Romans
I have written this letter
that I might have some benefit
of you and that I might have some
benefit of you

Paul the apostle

R. 1.

A D

AUTHOREM.

PErlegi equidem, serioque relegi commentationes tuas, Vir Erudite, de Summo Bono, seu verâ felicitate Christianorum : in quibus effecisti sanè, ut meritò dubitarem, utrum plus Doctrinæ ubique ostenderis, an Pietatis. Illud autem mihi certissimè constat, in isto te tractatu solidissima cùm Vitæ Beatæ, tum Christianæ magnanimitatis fundamenta posuisse. Non est igitur, quod insignem tuam aut in Adversis patientiam, aut adversus inimicos caritatem, aut divinæ voluntati in omnibus submissionem quis admiretur. In istis quippe dissertatiunculis cœlestem illam explicuisti Philosophiam, quæ nos adversus omnes vel temporum, vel fortune, vel naturæ insidias munit ; quæ ita fortis est, ut nullius incuriæ impetum extimescat ; ita lenis,

Ad Authorem.

lenis, & suavis, ut omnes arumnarum acerbitates facile mitiget, ac molliat; ita domum utilis, & fructuosa, ut totam se ad humanas utilitates liberalissimè porrigat atque explicet. Hujusque ductu animi tui aciem à splendidis quidem, sed fallacibus sæculi hujus quàm citissimè transiture lepociniis, in eternum duraturam Summi Numinis benignitatem, ut virum bonum, ut Philosophum, ut Theologum decuit, sapientissimè convertisti: speique anchoram fixisti, non in lubrica hominum fide, non in terreni auxilii arenoso fundo, sed in immobili illà divinæ misericordiæ rupe, unde nullæ calamitatum tempestates te unquam divellere valebunt. In tuto itaque es, ac immunis à naufragii periculo; & quamvis ventorum fluctuumque furore vexatus, haud procul tamen à portu, in quem te confido brevi feliciter iri receptum. Quod ad dissertationum stylum, de quo nostrum requiris judicium, attinet; profectò mihi in eo videris consilium illud sequi Ciceronis, qui (in Timæo


Ad Authorem.

Timæo) ex professo præcipit, ut cùm de re stabili & immutabili disputatur, oratio talis sit, qualis fit illa, quæ neque redargui, neque convinci potest. Plura nunc non addam, nè animum tuum semper melioribus addiçtum, intentumque de rerum divinarum contemplatione, ad nugas meas deducam. Vale itaque, virorum felicissime, internâque illâ, quam divine Philosophiæ beneficio, ac longinquo magnanimitatis exercitio demum tibi comparâsti, tranquillitate semper imperturbatus perfruere. Ita ex animo vovet

Virtutibus tuis addiçtissimus,

Septemb. 4. 80.

Gualt. Charleton.



I Dissertatio Prima.

Matth. 19. 17.

Nullus est Bonus, nisi unus, DEUS.

VERA, ac genuina Doctrinæ
hujus Intelligentia, quam ipse
protulit Θεός, DEUS
INCARNATUS, Homi-
nem per sui Cognitionem ducit ad cogno-
scendum DEUM: Qui ipsum nihil esse
sentit, DEUM esse OMNIA facile
credit: Hic solus Divinam percipit Bonita-
tis plenitudinem, qui se vacuum Ea prorsus
Intelligit: “Nullus est bonus, nisi unus,
DEUS. Quid sit Bonitas nos penitus in-
quiramus, ut unum bonum DEUM unice
colamus, unice amemus.

Arridet mihi pervulgata ista Bonitatis
Descriptio, Bonitas est conformitas Rei, &
Voluntatis. Res autem hoc in loco non
idem significat, quod τὸ πᾶν apud Græ-
cos, sed quod τὸ ὅν: aliter enim DEO
non competeret Bonitas his vocibus descrip-
ta. Voluntas est τὸ ὄν (Entis) Capacitas
Intellectualis. Capacitatis hujus Expletio-
nem,

nem, Fruitionem Intellectualem vocamus. *Conformitas Rei, & Voluntatis* est Aptitudo ad explendam hanc capacitatem.

Entis capacitas Intellectualis INFINITA, Ens ipsum *Simpliciter Infinitum*, & aptitudo ad explendam hanc capacitatem, ipsaq; hujus capacitatis Expletio, seu Fruitio INFINITA Idem est ipse DEUS, Actus *simplicissimus, Fons Immensus Essentia*, qui Verè est OMNIA, Cui quicquid est in *Rerum natura* Esse suum acceptum refert. Ad Imaginem sui se Hominem creasse testatur DEUS, ut per *Intellectum* semper perciperet *Summum Bonum*, per *Voluntatem* Eodem semper frueretur. Utrum Divinae hujus Creaturae Intellectus, & Voluntas à se invicem Realiter distinguantur, vel sint una Animæ vis exerere se Potentis in varios Motus istos, quos Actus Intellectus, & Voluntatis appellamus, utinam, Amice Lector, satis esset apud Philosophos, aut Theologos potius, determinatum. Haud equidem is ego sum qui ad arduam hanc tot. tantisque Dubiis involutam Quæstionem discutiendam idoneum me existimarem. Itaque conceptus nostros, qui ad intellectum, & voluntatem aliquo modo spectant, eâ exprimendi ratione proferre conabor, ut omnium, quacunque de
hac

hac re Opinione imbuuntur, Lectorum apprehensionibus æquè convenient. His præmissis progrediatur Oratio ad explicandos intimos Sensus *Thesium* istarum, quas in hoc Textu à *Spiritu Sancto* prolatas speculamur.

Nullus Homo est Bonus, nec alia ulla Creatura: DEUS (qui, ut supra dixi, *Bonitatis* est INFINITAS) Bonus est in omnibus Operibus suis: hoc est, Omnia DEI Opera sunt *Bona*. At forsan dicat aliquis, Contradictionem implicant hæ Duæ Propositiones, cum omnia Creatura sint DEI opera. Respondeo: Quando Creaturis *Bonitas* attribuitur, nil aliud intelligendum est, quàm *Participatio Bonitatis*, quâ solus perfruitur *Essentialiter* DEUS, & per DEUM hanc ipsam *participat* ea sola Creatura intelligens (nam cæteris Creaturis nil *Bonum* est, vel *Malum* in sensu strictiori, cum Bonitas sit *Conformitas Rei*, & *Voluntatis*, seu *Appetitûs Intellectivi*) intelligens inquam quæ ipso perfruitur DEO, nempe cujus voluntati præcepta Divina, atque omnia, quæ in cælis, vel in terris fieri vult DEUS, sunt omnimodè congrua. Adeo ut verissima sit propositio ista, Nil præter Creatorem est *Bonum*, cum nullius voluntati *Conformis* sit Creatura aliqua, nisi in quantum per
ejus

ejus Operationem, vel saltem *Essentiam* DEUS *Voluntati* exhibetur, vel (ut ita dicam) in *Acceptationem* proponitur. Constat hæc veritas de *Damnatis* vel Angelis, vel Homini-
bus: Hos scilicet nil aliud *Esse*, quàm *Justitiæ DEI Ultricis* objecta, adeo ut Eorum *Essentia* nullius *Voluntati* *Conformiter* se habeant, nisi *Unius DEI*, vel Angelorum, atque Hominum eorum qui (ut *Phrasi Apostolica* utar) *divina consortes sunt Naturæ*, 2 Pet. 1. 4. DEUS per *Efficaciam* (si ita loqui liceat) *ESSENTIÆ* suæ, quæ *Identica* est cum *Bonitate INFINITA*, Omnem *Essentiam Bonam* reddit, sibi nimirum suisque omnibus, nempe iis creaturis, quæ *DEI*, non *SUI JURIS* seipsas esse agnoscunt; atque ita εὖ περὶ τοῦ, Bene se habent, seu feliciter agunt in participatione *Naturæ Divinæ*. Hic quæri possit an Angeli atque homines *Damnati*, in quantum *sint*, non aliquo modo consortes habeantur naturæ divinæ, cum sit ea *INFINITAS ESSENTIÆ*. Respondeo, vel infensissimos *DEI* Hostes aliquo modo esse *Naturæ* ipsius *Consortes*, sed etiam eo modo non esse rectè dicendos, quo dicuntur *INFINITO* ejus *Dominio* non esse sub-
jecti: scilicet non *Activè*, sed *Passivè*
tantum

tantum *Naturam Divinam* in se recipiunt, cum Unusquisque eorum Quod est, esse nolle. Quod ad Impios istos spectat, qui adhuc in Terris degentes *Sanctitatis* acquirendæ, seu potius à DEO acceptandæ capaces sunt, dicimus eos non tantum quoad *Essentiam*, sed etiam quoad eam *Sanctitatis* acceptandæ Capacitatem Bonos esse, nimirum *Voluntati Divinæ*, atque eidem se *Conformiter* habenti cujuscunque *Creaturæ Voluntati* conformes. At dixeris fortasse plurimos eorum suis vivendi modis se oblectare, variisque affluentes deliciis se felices jactare, dum *Voluntate avertuntur* à DEO, dum *Irregenerati* sunt, nec aliquid DEO gratum perficiendi Potentiam illam in CHRISTO oblatam accipiunt. SENECAE verbis utar pro Responsione CHRISTIANO dignâ. “ Bonum tunc habebis tuum, “ cum intelliges infœlicissimos esse felices. Epist. 124. Scilicet audacter dicam φιλο-
 λόμοις omnibus, hujus sæculi amoris deditis Animalculis, licet in hoc Mundo florentissimis, nullum omnino esse Actu Bonum. Quid enim possit unquam istiusmodi Homuncionis, his licet rerum Minutiis, quas Divitias, Voluptates, Honores vocant, perpetuò abundantis *Voluntati* convenire, seu
 B esse

esse conforme, qui (usque adeo me juvat
 eximii *Scholastici* verbis immorari) *Volun-*
tate avertitur ab Illo, in quo sunt OM-
 NIA, DEO OPT. MAX? At quæri
 possit an *Voluntati Conformis* sit Actus ipse
Voluntatis, ad Terrena propter se amata
 tendentis, quò terminet sese in iisdem ac-
 quirendis, & in Animi Requiem seu Gau-
 dium resolvatur appetitio? Respondeo, actum
 istum *Voluntatis* ipsi *Voluntati* nequaquam
Conformem esse, nempe quòd *Prævus*, &
Iniquus sit, Animæ Rationalis naturæ mi-
 nimè *Congruus*: Hæc enim ad DEUM
 solum propter se amandum apta est creata:
 nec magis *Appetitus sensitivo* incongrua sunt
 foetidissima *Stercora*, quàm *Intellectivo* quælia-
 cunque *Sensibilia*. Hæc vocat Hominum
 sapientissimus *Vanitatem*, & *Afflictionem* spi-
 ritûs, Eccl. i. 14. Quomodo autem vani-
 tas, & afflictio spiritûs, vel ipsa ad vanita-
 tem, & afflictionem spiritûs propensio OM-
 NIUM perfruendorum capacitati se præ-
 stet *Conformem*? “ Non est pax impiis, dicit
 “ dominus meus, Isa. 57. Scripturæ ubicunq;
 impiorum inquietudinem ac turbidas *Cupi-*
dinum revolutiones ostendunt, fortissimè e-
 vident, ut constet hæc Veritas: Nullam esse
 impiis *Animi Concordiam*, seu Rei alicujus
 cum

cum Animo falsi Judicii ductu Appetente, *Convenientiam*. Theseos istius institutam explicationem sic itaque concludo: Nulla Creatura aliquo modo *Bona* habeatur, nisi in quantum se **DEUS** per eam sibi, & *Divina Consortibus Natura* Creaturis perfrundum exhibeat. Finita omnia nil sunt aliud, quàm **LUCIS INFINITÆ Radii**, **IMMENSIBONITATIS** Oceani effluvia.

Quod ad Thesin secundam attinet, quàm suavitur cecinit Psalmista, Psa. 145. 10. “Celebrent te Jehova omnia opera tua, & “quos Benignitate prosequeris benedicant tibi! Benedicant Tibi; Bonitatem tuam agnoscant, quam omnia opera tua clarissimè ostendunt.

DEI opera distinguenda sunt in *Opera Creationis*, & *Opera Providentia*. Per *Opera Creationis* ipsas Creaturas intelligo à **DEO** productas, & conservatas. Per *Opera Providentia* intelligo ea omnia, quæ à **DEO OPT. MAX.** omnes omnium creaturarum inter se Motus ad gloriam suam illustrandam disponente quoque modo eveniunt. Omnia, inquam, quæ quoquo modo à **DEO** profisciscuntur, sunt *Bona*. Atque ut **ARNOBII** verbis utar, “Nihil à Deo principe
B 2
quod

“quod sit nocens atque exitiabile, profi-
 “cisci: hoc tenemus, hoc novimus, in hâc
 “unâ consistimus cognitionis, & scientiæ
 “veritate: Nihil ab illo fieri, nisi quod sit
 “omnibus salutare; quod dulce; quod
 “amoris, & gaudii, lætitiæque plenissi-
 “mum; quod infinitas habeat atque in-
 “corruptibiles Voluptates; quod sibi quis-
 “que contingere votis omnibus expetat.
 Ad altissimam hanc veritatem attollenti
 mihi animum, nullum occurrit Dubium
 præter hoc ipsum, Quo sensu Bonæ dicantur
 variæ istæ calamitates, quæ Homini-
 bus in Terris degentibus contingunt, cuj-
 usmodi sunt Morbi, Vulnera, acerbissima Oppro-
 bria, extrema Paupertas, nempe rerum ad
 vitam sustentandam necessariarum inopia,
 & quæcunque appellantur *Mala Physica*? Ut
 hunc nodum explicemus probandum est,
 Nullum *Malum Absolutum* præter peccatum
 posse unquam ad Hominem pertingere, ad
 Hominem, inquam, Gratiæ & Salutis ca-
 pacem: Qui verò omnino non possunt non
 in Æternum separari à DEO, BONITA-
 TE INFINITA, his nullum est Bonum
 sive *Actu*, sive *in Potentia*. Probo autem
 Hominem quempiam ad DEUM *Conver-*
sum, vel *Conversionis* capacem, nullum malum
 Absolutum, &c. Nil

Nil præter peccatum, quod Homini per se nequit cedere in Bonum, potest unquam ad Hominem pertingere:

Omne Malum absolutum est quod per se nequit cedere in Bonum, Ergo

Nullum Malum absolutum potest unquam ad Hominem pertingere.

Major hinc constat, quòd omnia præter peccatum, quæ ad Hominem pertingunt, sunt *Voluntatis Divinae* effecta, ideoque nequaquam non esse Homini *Bona*, seu ejus *Voluntati conformia*, si ipse *convertatur* ad DEUM. Eatenus tantum *Malorum* rationem Calamitates induunt, quatenus sunt ii, quibus inferuntur, à DEO separati. Morbi, Dedecus, Paupertas, &c. iis sunt *Premia Peccati*, qui *serviunt Peccato*: qui verò in *Libertatem* eluctantur, his sanè auxilia fiunt, ac gratissima adjumenta. *Carne* depressa assurgit *Spiritus*. Morbus corporeus fit animi Medicina. Sævissimis Hominum *Maledicorum* opprobriis lacerati gaudemus conformes fieri domino, & DEO Nostro CHRISTO in Æternum *Benedicto*. Rerum externarum inopia nos arctius astringit DEO, in quo sunt OMNIA; adeo ut cum Apostolo placidè, ac lætanter gravissimam feramus pauperiem, “ Tanquam

“ nihil habentes, & omnia possidentes,
 “ 2 Cor. 6. 10. Quum Morbus Membra
 “ dissecat, Animus viget robustior, ut cecinit
Prudentius. De medica calamitatum virtute
 sic loquitur venerabilis ille *Salvianus*, de
 Gubernatione Dei Lib. 6. “ Nunc asperis
 “ rebus Deus castigat suos pro disciplinâ,
 “ nunc tranquillis fovet pro indulgentiâ.
 “ Sicut enim optimi, & peritissimi medici
 “ dissimilibus Morbis Curas dispares præ-
 “ stant, atque aliis per dulcia medicamina,
 “ aliis per amara succurrunt, & quosdam
 “ curant cauteriorum adustione, quosdam
 “ malagmatum placabilitate, aliis adhibent
 “ duram Ferri sectionem, aliis blandam in-
 “ fundunt Olei lenitatem, & tamen di-
 “ versissimis licet curis eadem Salus quæri-
 “ tur : ita etiam Deus noster si quando
 “ nos plagis austerioribus coercet, quasi cau-
 “ teriis, & sectionibus curat; quando
 “ autem rebus prosperis refovet, quasi oleo,
 “ ac malagmatibus consolatur, per diversam
 “ enim opem ad unam nos vult perducere
 “ sanitatem. Hæc sunt ipsius verba : Caro,
 “ inquit Apostolus, concupiscit adversus
 “ Spiritum, Spiritus adversus carnem; hæc
 “ enim invicem sibi adversantur, ut non
 “ quæ vultis, illa faciatis. Ergo si repug-
 “ nante

“ nante corpore quæ volumus facere, non
 “ possumus, infirmandum Corpore est, ut
 “ optata faciamus. Et verum est: Imbecil-
 “ litas enim Carnis Mentis vigorem exa-
 “ cuit, & affectis artubus vires Corporum
 “ in virtutes transferuntur Animorum,
 “ ut mihi genus quoddam Sanitatis esse vi-
 “ deatur, hominem interdum non esse Sa-
 “ num: nulla enim admodum tum Spiritui
 “ cum corpore, id est, nulla Divinæ indoli
 “ cum Terreno hoste luctatio est: non
 “ turpibus Flammis Medullæ æstuant, non
 “ malesanam mentem latentia incentiva
 “ succendunt, non vagi sensus per varia ob-
 “ lectamenta lasciviunt, sed sola exultat
 “ Anima læta Corpore affecto, quasi ad-
 “ versario subjugato.

Animo Bono quàm *Bona* sint Convitia
 & Opprobria, his verbis ostendit *Gregorius*
 ille Magnus Moral. L. 10. C. 15. “ Nonnun-
 “ quam verò recto operi animus constanter
 “ innititur, & tamen Humanis Irrisionibus
 “ urgetur. Miranda agit, & opprobria reci-
 “ pit, & qui exire foras per Laudes potuit,
 “ repulsus contumeliis ad seipsum redit; &
 “ eo seipsum intus robustius in Deo solidat,
 “ quo foris non invenit, in quo requiescat.
 “ Tota enim spes in auctorem figitur, & inter

“irrisionum convitia solus interior Testis
 “imploratur: atque afflicti animus fit Deo
 “tanto proximus, quanto & à gratiâ hu-
 “mani favoris alienus in precem protinus
 “funditur: & pressus exterius ad pene-
 “tranda quæ intus sunt mundiùs liquatur
 “—— “Ut Caro mollibus (inquit C. 13.) sic
 “Anima duris nutritur: illam blanda re-
 “fovent, hanc aspera exercent: illa delecta-
 “tionibus pascitur, hæc amaritudinibus ve-
 “getatur.

Sic *Diligentibus D E U M omnia cooperan-
 tur in Bonum* (Rom. 8. 28.) in summum
 Bonum consequendum. Sic *Id quod in præ-
 senti est momentaneum & leve tribulationis
 nostræ, supra modum in sublimitate æternum
 Gloriæ pondus operatur nobis*, 2 Cor. 4. 17.
 Malis autem, & curvis in Terras animis res
 arduæ pro *Malis* habentur, nempe *mala*
 Voluntati minimè conveniunt, quippe quæ
 ipsa sibi repugnat. Ab ipso Summo Bono se
 avertit, dum passim quæritat *Bonum*. Sic
 Animus *Malus* D E O adversus rebus im-
 primit, quod inde patitur *Malum*. Qui verò
 Sapientissimo *Calamitatum* Auctori, Om-
 nium rerum Creatori, Servatori, Guberna-
 tori subditum animum gerit, supra *Ap-
 petitum Sensitivum* elevatus Gaudii Mate-
 riam

riam sub ipsâ invenit *Tristitiâ* : nec quod Anima ipsius *Molestum* sentit, *Malum* agnoscit *Animus*. Ultra peroranti occurrit mihi Eximius ille Grotius, summus Literarum Antistes, Religionis Christianæ Vindex acerrimus. Carminibus hisce venerandis explicat Animi mei fensa :

*Exilia, morbos, damna, pauperiem, probrum
Mala quisquis arbitratur, ipse est non Bonus.*

*Mala quisquis egit, patitur: artificem in suum
Isthæc redundant, quaq; nascuntur, manent.*

Homo ipse summus semper est hostis sibi.

*Quid, stulte, vitas castra, mare, turbas, fo-
Nescis ubi omnis summa sit periculi : (rum?
Si vis tibi cavere, te primùm cave.*

Operæ pretium erit eruditam *Seneca* sententiam de vero Bono recitare. “Quicumque
“beatus esse constituit, unum esse Bonum
“putet quod Honestum est : nam si ullum
“aliud existimat, primùm malè de provi-
“dentiâ judicat, quia multa incommoda
“Justis viris accidunt, & quia quicquid
“nobis dedit, breve est & exiguum, si com-
“pares Mundi totius ævo. Ex hac deplo-
“ratione

"ratione nascitur, ut ingrati Divinorum
 "interpretes simus, querimur quod non
 "semper, & quod pauca nobis, & incerta,
 "& abitura contingant. Inde est quod
 "nec vivere, nec mori volumus. Vitæ nos
 "odium tenet, timor Mortis. Nutat omne
 "consilium, nec implere nos ulla foelicitas
 "potest. Causa autem est quod non perve-
 "nimus ad illud Bonum immensum & in-
 "superabile, ubi necesse est resistat Volun-
 "tas nostra, quia ultra Summum non est
 "locus. Quæris, quare Virtus nullo egeat?
 "præsentibus gaudet, non concupiscit ab-
 "sentia, nihil non illi Magnum est, quia
 "Satis. Ab hoc discede Judicio, non Pietas
 "constabit, non Fides: multa utramque
 "præstare cupienti patienda sunt ex his,
 "quæ Mala appellantur: multa impenden-
 "da sunt ex his, quibus indulgemus tan-
 "quam Bonis. Perit Fortitudo, quæ peri-
 "culum facere debet sui: perit Magnani-
 "mitas, quæ non potest eminere, nisi om-
 "nia veluti minutâ contempserit, quæ pro
 "maximis vulgus optat. Epist. 74. Cicero eti-
 "am veram (ut ita dicam) *Veri Boni* umbram
 "Tenebroso Sæculo exhibere videtur hisce
 "verbis: "Ego neque pecunias istorum, ne-
 "que tecta magnifica, neque opes, neque
 "imperia,

n " imperia, neque eas quibus maximè adstri-
n " cti sunt Voluptates in Bonis rebus, aut
i, " Expetendis esse duxi: quippe cum viderem
d " rebus his circumfluentes, ea tamen desi-
s " derare maximè, quibus abundarent: ne-
e " que enim expletur unquam, nec satiatur
s " Cupiditatis sitis: neque solum ea, quæ
" habent, libidine augendi cruciantur, sed
" etiam amittendi metu; in quo equidem
" continentissimorum hominum Majorum
" nostrorum sæpe requiro prudentiam, qui
" hæc imbecilla, & commutabilia Pecuniæ
" membra, verbo B O N A putaverunt ap-
" pellanda, cum re, ac factis longè aliter
" judicavissent. Potestne Bonum cuiquam
" Malo esse? aut potest quisquam in abun-
" dantiâ Bonorum ipse esse non Bonus? At-
" qui ista omnia talia videmus, ut etiam
" Improbi habeant, & obsint Probis.

" Quid est igitur, quæret aliquis, Bonum?
" Si quid rectè sit, & Honestè, & cum Virtute,
" id B E N E fieri verè dicitur: & quod
" Rectum, & Honestum, & cum Virtute est,
" id solum opinor Bonum.

" Profectò, inquit, nihil est aliud Bene,
" & Beatè vivere, nisi Honestè, & Rectè
" vivere. At verò quid sit id Honestè, &
" Rectè vivere nemo novit, nisi cui D E U S
hoc

hoc ipsum indicavit. “Indicabo tibi, ô
“homo, quid sit Bonum, & quid Dominus
“requirat à te: Utique facere Judicium,
“& diligere Misericordiam, & sollicitum
“ambulare cum Deo tuo, Mic. 6. 8. Ag-
noscite, Lectores *Christiani*, Dominum DE-
UM Vestrum, qui *Vult* omnia, quæ acci-
dunt vobis, Bona facere, OPTIMUM,
Qui *Potest*, MAXIMUM; Cui OPTI-
MO MAXIMO sit omnis Laus, Honor,
ac Gloria in Sæcula Sæculorum. *Amen.*

Differtatio Secunda.

Eph. 5. 20.

*Gratias agentes semper de Omnibus in
Nomine Domini Nostri JESU
CHRISTI DEO-ET-PATRI.*

EX Suppositâ Bonitate per Omnia
DEI opera penitus diffusâ sequi-
tur debere Homines DEO-E-T-
PATRI *Semper de omnibus Gratias agere :*
nempe cum sit Bonitas DEI infinita, necesse
est ut ubique semper emineat, adeo ut id,
quod Est Homo, quod Habet, quod Agit
unquam, nisi in quantum DEO repugnet,
nil sit aliud, quàm Beneficentie Divinae opus,
seu Homini à DEO collatum Beneficium.
Prælectum hoc Scriptum Apostolicum, *Spiri-
tui Sancto*, qui Paulum ipsum ad scribendum
impulit, sedulò innixus, aliquatenus expli-
candum in me recipio. *Gratias agentes, &c.*
Ut summo hoc erga DEUM officio, quod
verbis hisce nobis innuit Apostolus, rite
fungamur, Primò disquiremus, Quid sit
DEO-E-T-PATRI *de omnibus Gratias
agere*, deinde quid *Semper*, postremò quid *In
Nomine*

Nomine Domini Nostri JESU CHRISTI
 Qui DEO ET PATRI de omnibus
 Gratias agit, esse eum animitus agnoscitur
 Causam Primam *Rerum* omnium, ac *Eventuum*,
peccatis solummodo exceptis; inde etiam
 agnoscit sibi bona esse omnia, quæcunque
 ad ipsum per *Providentiam Divinam* quo-
 cunque modo pertingunt: hinc oritur quæ-
 stio non vulgaris, An scilicet peccata aliena,
 quæ sunt nobis maxima vitæ incommoda, ut
 pote furtum, contumelia, atque alia hujus
 modi facinora, sint nostræ erga DEUM
 Gratitude Materies? Ut dissolvatur hic
 Nodus, animadvertendum est nequaquam
 esse DEUM Peccati authorem, non esse illi
 Gratias pro peccato aliquo agendas, sed
 per *Providentia Divina* Ordinationem eve-
 nire, ut ad nos Peccata aliorum, quoad Cor-
 pus, Fortunam, vel Animum hoc vel illo mo-
 do pertingant, & quisquis sit ille modus,
 necesse est propter *Infinitam* Providentiæ
 Divinæ Bonitatem, ut Spiritus sancti *Fructus*
 sit inde carpendus, magnum æternumque
 Emolumentum sumendum. At dixeris for-
 tasse, Aliorum peccata aliquando mihi ani-
 mum perstringunt eadem perpetrandi hor-
 rendâ cupidine. Respondeo: Non oritur
 Cupido ista ab ipsis aliorum Peccatis, sed ab

ab ardesciente sub imis medullis propria
Concupiscentiâ : cui extinguendæ si totis incumbas viribus, dum animo spectas aliorum peccata, *Concupiscentiæ* Effluvia, flagrantiori contra proprium peccati Fomitentem odio, ac indignatione obnitendum tibi esse clariùs videbis : nempe turbidos *Opinionum* fumos, & tetras *Concupiscentiæ* favillas removendo certissimè cognosces Peccata omnia nil aliud haberi debere quàm foetorem *Spiritualis*, qui eo odiosior est Foetidis omnibus quæ *Sensus* lædunt, quo præstantior est Corpore fragili in *Cineres* redituro *Animus* Immortalis, *Divinæ Particula Auræ*.

“ *Peccante nil est tetrius,*

“ *Nil tam leprosum, aut putridum,*

“ *Cruda est cicatrix criminum,*

“ *Oletque ut antrum tartari,*

ut cecinit clarissimus *Prudentius*. Quàm fœda puritatis infinitæ nobis quodammodo inesse debita privatio ! *Tenebræ* quàm horrendæ *Lucis Infinitæ* absentia ! Hæc cogitat sapiens aliorum Peccata secum reputans, hinc *DEO ET PATRI* Gratias agit, quem summum peccati cujuscunque odium in animo suo excitantem sentire gessit. Quodd

Quodd autem qualescunque Corporis, aut Fortunæ Conditiones homini *bonum* gerenti animum facile convertantur in *Bonum*, dubium esse nemini potest, qui præcedentem Dissertationem rite intelligit.

Ultima Gratitudeinis erga DEUM exhibendæ Pars restat dicenda, quæ præcipuè in eo consistit, ut universa, & singula DEI Opera pensitemus adeo, puro versantes animo, ut levia esse, & inania omnia existimemus, nisi in quantum extimulent nos ad fervidiorem DEI ET PATRIS Dilectionem. Hic solus se DEO Gratum præstat, qui Bonitatem ejus Infinitam perspicit, adeo ut alibi non quærat Bonum, nisi in faciendo ea quæ Lex Divina jubet. Hoc esse DEO ET PATRI Gratias agere his verbis innuit Apostolus, Col. 3. 17. "*Quicquid egeritis sermone, aut facto, in nomine Domini Jesu id facite, Gratias agentes DEO ET PATRI per Eum.*" De externâ Gratiarum actione non opus est ut multa dicam: nam cui dubium esse possit, quin ea necessariò sequatur quodocunque se offert Occasio, ex iis, quos enarravi, animi grati affectibus? Omnibus constat nostri non esse officii de DEO ET PATRE semper Meditari, aut Loqui, aut quæ immediatè ad Cultum ipsius

sius spectant Facere : at Semper debemus ab omni iniquâ Opinione Purgatam *Mentem*, ab omni Cupidinis Imperio Liberum *Cor* nostrum præstare, cogitando, loquendo, faciendo, eam semper animi *Virtutem* exerentes, quam indidit nobis *DEUS ET PATER Spiritum sanctum* nobis exhibendo per *Domini Nostri Jesum Christum*. Nè multis agam : Sæpiissimè quoad *Actum*, semper quoad *Habitus* seu *Virtutem* *DEO ET PATRI* Gratias Externè agere debemus *In Nomine Domini Nostri Jesu Christi*. Per Nomen Domini Nostri Jesu Christi (millies repetitum placebit hoc Nomen) nos intelligere oportet *Illum ipsum* sub ratione Tituli cujusque seu *Nominis*, quo eum per S. Scripturas insignivit *Spiritus sanctus*, conceptum. Tituli ejus principales, seu Nomina sunt *Dominus, Rex*, (quæ duo vocabula *Christo* attributa Synonyma esse videntur) *Sacerdos, Prophetæ*. Hæc nomina, quæ *Christum* signant *Jesum Nostrium*, in *Mediatoris* nomine conveniunt, nempe in *Officio Mediatoris* fungendo *Regem, Sacerdotem, Prophetam* agit Ille *DEUS Incarnatus Benedictus in æternum*. Suavissima est illa *Poetæ* harmonia : *Regum est Parcere subjectis, & debellare superbos*. Veritatem, ubicunque eam invenio,

nio, in usum *Evangelii* prædicando mihi vindico. Ratio hujus nominis *Regis*, CHRISTO attributi hanc præcipuè Notionem continet: Conducere Omnia, quæ sunt in Terris, & in Cœlis per summè efficacem *Domini Nostri Jesu Christi* Potestatem ad *Sanctitatem* subditorum suorum in hâc Vitâ jugiter promovendam, & in Futurâ *Gloriam* eorum constituendam in Æternum: Atque etiam ad *Debellandos superbos*, ad *Pœnas* illis infligendas, qui “Nolunt eum
 “Regnare supra se, Luc. 19. 27. *Sacerdos* hic Noster *Θεοδωτης*, qui *Sacrificium* pro peccatis nostris in *Cruce* Seipsum obtulit,
 “Perpetuum habet Sacerdotium (ut loquitur Apostolus) unde & servare perfectè potest eos, qui per ipsum accedunt
 “ad D E U M, semper vivens ut interpellat pro eis, Hebr. 7. 25. Hujus *Sacrificii*, ac *Interpellationis* Efficaciâ *Charitas*
 “Dei effusa est per Spiritum sanctum in cordibus eorum (Rom. 5. 5.) qui sunt ex Fide
 “Jesu (Rom. 3. 26.) Et diligentibus D E U M, his scilicet qui Charitatem Dei in cordibus suis effusam habent, Omnia cooperantur in Bonum, adeo ut in objecta *Gratitudinis* evadant vel maxima vitæ incommoda, Exilia, Morbi, Damna, Pauperies, Probrum.

Officium

Officium *Christi Propheticum* est ea omnia quæ ad Animæ immortalis Salutem spectant nota facere. *Spiritu* suo in Prophetis olim loquutus est: Deinde Naturam adsumens Humanam ore proprio *Evangelium* prædicavit: In Terris versatus æternus Cælorum Incola *Viam quæ ducit ad vitam* mortalibus ostendit. Primò Apostolis, & Septuaginta Discipulis, deinde (postquam cælos conscenderat) multis aliis, postremò Ecclesiâ per totum Terrarum orbem diffusâ, hic, illic plurimis dedit, atque omni Tempore usque ad consummationem sæculi dabit potestatem prædicandi *Evangelium* (nempe secundum eas quas nobis reliquerunt Apostoli *Scripturas*) *Baptizandi* etiam atque in memoriam *sui Crucifixi* perpetuò celebrandam, Corporis, ac Sanguinis sui Sacramentum Christianis omnibus exhibendi.

Cui summus hic *Propheta* vel per externam *Ministrorum* prædicationem, vel alio quocunque modo scripti Evangelii sensus (ut ita dicam) *Grammaticos* ingerit, illi *Spiritum* suum offert, quo duce ipsum *omnis Veritatis* fontem assequatur, cui dum inhæret *Voluntas*, sacri *Ardoris*, seu charitatis lumine coruscante clarissimam salutiferæ veritatis *Notam* in ipsum refundit *Intel-*

lectum. Qui verò Spiritui Sancto ad DEUM ET PATREM ex toto corde, & ex totâ Animâ, & ex totis viribus, & ex totâ cogitatione per Christum diligendum ducenti repugnat, forsan & iste etiam quodammodo credat vera esse omnia, quæ scripserunt Apostoli, isti autem debilis est admodum, & perobscura eorum notitia: nam Intellectus ejus Veritati aliquando assentitur, sed ipsi nunquam adhæret.

“Summa Veritas Amor est (inquit S. Gregorius in 1 Reg. L. 1. c. 1.) subtilitate veritatis attollitur electa anima, ejusque rei charitate, quam didicerit, inflammatur: & tanto strictius servat mysterium, quanto ferventiùs id sibi inscruerat vis amoris. Fide (inquit L. 2. c. 3.) velut Famâ Deum cognoscimus: Amore autem contemplationis is, qui famâ innotuit, nobis velut ex ostensione præsentia revelatur. Magno illo major Gregorius carmina hæc Seraphica modulatus est:

Οὐτω τὸ φίλτερον Πρώξενον καὶ γνώσις,
Ἦδ' ἔς' ἀμύγων πρὸς Ἀληθείαν τείβῃ
Τῆς ἐν Δόγῳ, καὶ Στεφάνῳ τιμωμένης.

“Sic

“ *Sic Notionem charitas parit,*
 “ *Estq; ista multo melior ad verum via,*
 “ *Quàm sermo scitus, & leves argutia.*

Sic breviter explicavi quid sit *In nomine Do-*
mini Nostri Jesu Christi DEO-ET-PATRI
 gratias agere: Nimirum id esse ostendi, Per
Spiritum sanctum suavissimâ MEDIATO-
 RIS officiorum omnium efficaciam Animos
 nostros perfundentem cogitata, dicta, facta
 DEO-ET-PATRI grata offerre. Sanctus
Basilius in eximiâ homiliâ de *Gratiarum*
actione, quàm sit possibile animæ verè Christi-
 anæ *Semper gaudere, & de omnibus gratias*
agere, his verbis ostendit: *ψυχὴ ἡ ἀπαξ*
προσδεθῆσα τῆς πόθως τῆς Κτίσεως, & τοῖς ἐκεί
κάλλεσιν ἐκπιπτομένη φανερύεται, &c. “ *Anima,*
 “ *inquit, quæ semel se modis omnibus desi-*
 “ *derio astrinxit sui Creatoris, jamque insue-*
 “ *vit oblectare se tantæ illius pulchritudinis*
 “ *contemplatione, prorsus non sinet vehe-*
 “ *mens illud gaudium, Animique sui jucun-*
 “ *dissimam diffusionem intercipi, aut im-*
 “ *mutari per multitudinem, & succeda-*
 “ *neam carnalium affectionum mutatio-*
 “ *nem, quia ea potius, quæ aliis mœrorem*
 “ *afferunt, & tristitiam, in cumulum sibi ver-*
 “ *tet, & accessionem lætitiæ: cujusmodi e-*

"rat Apostolus, dum sibi probè admodum
 "complacet in infirmitatibus, in tribula-
 "tionibus, in persecutionibus, in necessita-
 "tibus, egestatem suam in gloriam & ex-
 "ultationem portans (*καυχόμενα ἑαυτοῦ τὰς*
 "*ἀσθενείας τοῦ σώματος*) In fame, ait, & siti,
 "in frigore, & nuditate, in persecutionibus,
 " & angustiis, ob quæ alii ægerrimè seipfos
 "ferunt, vitamque despondent suam, ho-
 "rum gratiâ Paulus sibi quàm optimè pla-
 "cet, & gaudio diffunditur. Illi igitur
 "Apostolicæ sententiæ rudes, minúsque in-
 "teligentes per eam invitari nos ad com-
 "plexum Evangelicæ Vitæ, eò impudentiæ
 "& temeritatis prosiliunt, ut incusare au-
 "sint Paulum, quasi is nobis præscribat
 "factu impossibilia. Atqui erudiantur, &
 "discant proponi nobis causas parandi istius
 "gaudii prorsus rationi consentaneas, id-
 "que solâ Dei munificâ Liberalitate. Quum
 "non essemus, ut essemus ipse fecit: Sumus
 "proinde ad nostri Creatoris facti imagi-
 "nem. Mente, & ratione insignimur, qua
 "Humanæ conditio Naturæ perficitur; &
 "Deum cognovimus: multifariam pul-
 "chritudinem rerum artifici solertiâ con-
 "ditarum edocti, per eas quasi literas
 "quasdam eximiam Dei, & singularem cir-
 "ca

“ca omnia providentiam pariter, & fa-
 “pientiam legendo agnoscimus. Boni à
 “Malo discernendi facultate præditi su-
 “mus: quod conducibile est ut eligamus,
 “quod periculosum est ut aversemur, ac
 “vitemus, ipsa nos edocuit Natura. Per
 “peccatum alieni à Deo effecti in gratiam
 “rursus per Unigeniti sanguinem sumus
 “revocati, & servituti ignominiosæ exem-
 “pti. Spes insuper resurrectionis, fruitio
 “multiplex Angelicorum Bonorum, reg-
 “num Cœleste, repromissa Bona, mentis,
 “rationis vim omnem exuperantia; Qui.
 “nam non conveniat hæc censere caulās
 “suggerere gaudii nunquam desituri, ac
 “perpetis lætitiæ abunde sufficientes, at-
 “que idoneas?

Sed infinitam Creatoris pulchritudinem
 non licet Ritè, seu (ut ita dicam) *Affectivè*
 aspicere, nisi per *Jesum Christum, Dominum*
nostrum, Lucem illam veram, quæ illuminat
omnem Hominem venientem in mundum. Me-
 um hæc cogitantis animum odio summo
 replevi Doctrinæ istius **SOCINIANO-**
RUM *Diabolice*, qui *Jesum Nostrum DE-*
UM esse pernegant. Quis nisi **DEUS**
 mundi totius Gubernationi sufficiat? quis
 nisi **DEUS** *Iratum DEUM* lenire queat?

quis nisi **DEUS** *Intima DEI* scrutetur, ac *Hominibus* sapientiam *Divinam* largiatur? Apage homunciones, qui *Ratiunculis* suis Unicam tentant redarguere **SAPIENTIAM**, **VERBO** ab *Æterno* existenti terminum durationis apponere! *Gigantes* olim fuisse fingunt *Poeta*, qui cum *Diis ipsis* Bellum gerebant: Nos hodie monstra hujusmodi horrenda reverâ cernimus: *Pumiliones* istos, *Infaustam* **SO-CINI** *Propaginem*, apertò prælio cum **DEO** pugnantes! Omnia tenenti *Regis Regum* dextræ sceptrum excutere conantur! At dixerint fortasse se nobis concedere Reges in ipsos imperium esse **JESU** *Nostri*, ipsique deberi cultum *Divinum*. Hoc autem nil aliud est quàm *Ejus capiti coronam spinosam imponere*, & *in dextram ejus pro sceptro arundinem* (Matth. 27. 29.) Quis enim *Rex Regum* esse possit, omniaque terrena, ac cœlestia suo subicere imperio, nisi **OMNIPRÆSENS**? Quis **OMNIPRÆSENS**, nisi **DEUS**? Cui verè debetur *Cultus Divinus*, nisi uni **DEO**, cum cultûs *Divini Ratio formalis* sit **DEUM** esse agnosci eum, cui exhibetur?

Utinam, Lectores, sibi plurimum caveret

Juventus

¹ *Juventus Academica* ab *Hæresi* ista, *Serpentis antiqui* prole, quæ *serpentis* instar *latere* gaudet, nisi cum *Calorem* quendam *Æstivum*, scilicet *faventem* sibi alicujus *Animum* sentiat, tunc citò exilit, spargit venenum, suoque inficit colore infœlicem *animum*, DEO invisum reddit, tantum *non Mortis Æternæ* faucibus jamjam correptum.

¹ Veneno huic maximè lethali, quod *Ecclesiæ* propinat mendaciorum Pater, optimum præparavit *Antidotum* summus ille Vir reverendus in CHRISTO Pater MATHÆUS WREN ò *Maxællus* : Explicat ille *Scripturas* sacras & in clarâ luce reponit, quarum saniores sensus tortuosâ suâ *Tractatione* involutos quodammodo imperceptibiles reddidit *Serpentinum Genus*.

Nos etiam, O JESU, OPTIME MAXIME, qui minores pro Te disputandi vires accepimus, nomen tuum invocamus, noctes atque dies humillimè precamur, ut *Ecclesiæ* tuæ *laboranti* succurras, usque adeo lumen diffundas tuum, ut te semper DEUM laudemus, te DOMINUM agnoscamus, nè falsâ *Rationis* adorandæ specie capti verum animi Ornamentum

tum F I D E M amittamus. *Charitate*
nostros perfundas animos, *Spem* Gloriæ tuæ
participandæ in nobis quotidie adaugeas,
ut de victis *Hominum Loquacium* erroribus
Divinos semper vivamus Triumphos. *Amen.*
Amen.

Differ-

Differtatio Tertia.

I ad Theſſalonicenſes 5. 16.

Semper Gaudete.

Semper de omnibus DEO-ET-PARTI gratias agere neceſſariò includit Officium hoc noſtrum *Semper gaudere*: Nam qui omnia, quæ à DEO unquam ad ſe proficiſcuntur, *Bona* ſibi eſſe ſemper animatus agnoſcit, ei nunquam deeſſe poteſt Gaudii materies, imò nec ipſum Gaudium: cum nil ſit aliud gaudere, quàm complacere ſibi Animum in amplexu *Boni* præſentis: ſcilicet hoc opus eſt, quod præcipue in hoc loco nobis præſcribit *Apoſtolus*. Sed glorioſo huic officio fungenti animo *Senſitiva* etiam *Facultates* inſervire debent, quod nobis probandum reſtat.

Supponimus interim ex præcedentibus orationibus ſatis conſtare debere *Animum* ex *Re* qualibet, aut *Evento*, peccatis ſolummodo exceptis, ſibi gaudii materiam attrahere. Omnibus in conſeſſo eſt cum *Res* proſperas, utpote Corporis Sanitatem, Divitias, Honores nobis largitur DEUS, debere nos
Mentem

Mentem adeo erigere in excitandis rerum istarum *Phantasmatis*, ut placidâ *Spiritus animalium* agitatione vivida vis Cerebro accrescat, & inde jucundissime affecta exultent pectora. *Voluntariam* istam Corporis agilitatem, quæ tam ad Corporis, quàm Animi vires augendas plurimum conducit, *Sanctorum* dictis, factisque abundè nobis commendant S. *Scriptura*. Testimoniorum instar omnium sit *Solomonis* istud, Eccl. 3. 4. "Tempus (est) *Flendi*, & tempus *Ridendi*: tempus plangendi, & tempus saltandi. Risus, & saltatio *Sensitivam* istam gaudii partem seu *Latitiam*, ut Fletus, & planctus mœrorem ostendunt. Scilicet pro Naturâ rerum externarum, quas objicit nobis *Providentia Divina*, in *Latitiam*, aut *Tristitiam* aliquatenus indulgendam animum dare nostri est erga Sapientissimum rerum omnium dispensatorem officii. Affectus hosce contrarios sagaci cuique, ac verè prudenti viro facile est moderari, & ad amissimæ rectæ rationis accuratiùs exigere, nempe dum, nebulis *Opinionum* per *Veritatis* fulgorem dissipatis, mirabilem commodorum, incommodorumque *Misturam* respicit. Rectè quidem *Mantuanus*: "Commoditas
 "omnis sua fert incommoda secum: sic & incommoditas sua commoda. Mqui-

Μεμίξεσαι ἰδὲ κακοῖσι, inquit *Hesiodus*.
Sic D E U M alloquitur calamitatis (citra
Metaphoram) inundantis fluctibus obrutus
summus ille vir, *Gregorius Nazianzenus*, de
vitâ suâ Carm. p. 3.

Πάντων ὑπογνῆς ἥ κατὰ πρὸς σε βλέπω
Ζωὴ, πνοή μου, φῶς, κράτος, σωτηρία,
Φοβὼν, πάσας, μηδῖων, ἰώμενος,
Πλῆκων τὸ χρεῖδον τοῖς ἐναντίας αἰε.

*Diffusus imis omnibus rebus, Deus,
Te specto, vita, lux, salus, robur meum,
Qui nunc minaris, aut feris, nunc blandiens
Sanas, molestis inferens lætas vices.*

“Etiam hoc (Bonum temporale) ex ad-
verso illius (Mali scilicet) facit Deus, in-
quit *Hominum sapientissimus*. Hæc nos de-
ducunt ad instituti nostri præsentis *Apicem*,
nempe ad enarrandum quale sit id *Letitiæ*
feu gaudii *Sensitivi* quod fatis acerbissimis
agitati homines vere *Christiani* per *Rationem*,
Spiritu Sancto adjuvante, *imaginationi* impe-
rantem, inter ipsos *Planctus* exerunt. Hac
de re profundâ mente cogitanti mihi Tria
præcipuè dicenda occurrunt. Primò la-
tantur illi, quibuscunque conflictantur in-
commodis,

commodis, per *Redundantiam* gaudii Coelestis à *Voluntate* deiformi in *Appetitum sensiti-
vum* jugiter effusi: Ipsa sane Tristissimo-
rum *Eventuum Phantasmata*, quibus inter
cogitandum utitur DEO verè devotus
Animus, suaviore quodam sapore perfundit
placida *Intellectus* operatio, quam ut iis sit
admodum adversus vel ipse *Appetitus sensi-
tivus*, licet Naturaliter ab iisdem maxime
abhorreat. Usque adeo — *Gaudet Pati-
entia Duris*. Distat sanctorum dolor ab eo,
qui *Mortem operatur*, 2 Cor. 7. 10. nec *Mundi
dolor* fit illis ista *Aegritudo*, quam *Adversa
mundana* afferunt. Secundò, viri Boni cum
Fortunâ malâ colluctantes, iis quæ restant
sibi commodis gaudere nunquam desinunt:
qualescunque prosperitatis reliquias in ad-
versa faciliùs toleranda mente sedulò revol-
vunt. Atque eò quòd primariæ eorum in-
tentiones ad *Patrem luminum* perpetuò diri-
gantur, clarissimè perspiciunt, quid sibi
agendum sit in gravissimis *Ærumnis*, quò
finem omnium actionum suarum assequan-
tur. Si qua etiam Bona externa, seu com-
moda, ut plerumque fit, Casus acerbus secum
trahat, subito hæc cernunt, penitus inspeci-
unt. Atque adeo *παλαίαι τεχνολογία* (*E-
pict. Enc. c. 5.*) *Visis asperis perferendis quasi
fessam*

fessam & laceratam *Imaginationem* recreant,
 sanant, *Spiritus depressos* erigunt. Vident
 illi non raro ex iplo dedecore Honores sibi
 emergentes, ex ipsâ pauperie opulentiam,
 ex ipsis stultorum opprobriis summas laudes
 Sapientium: ex iniquis etiam virorum
 non improborum censuris *Divinam indolem*
 citra Fastum ostentandi occasionem. At
 rabidæ impatientiæ morfu cruciatus in ad-
 versis Animus huc, illuc discurrit: Inimicæ
 Fortunæ Telis *Imaginationi* infixis se vulne-
 rat: Se furore agitatum (ut cum Poeta
 loquar) — “Nunc huc, nunc dividit illuc,
 “In partesque rapit varias, perque omnia
 “versat: Omnia autem sibi *adversa* sentit,
 distorquet sese, naturæ repugnat, *Voluntate*
 ab eo *avertitur*, quod fecit DEUS: Vult
 iste insanus animus, — τὸ τετράγμενός ἔχει
 ἀτυχτον. Ut verâ virtute præditus in ad-
 versis cum *Christo* patitur, sic patitur iste,
 qui vitiis, seu turpissimis Mundi amplexibus
 inhæret, cum *Diabolo*, & *Angelis* ejus,
 Matth. 23. 41.

Quod nobis ultimò dicendum restat de
 viribus Patientiæ *Christiane* ad *Sensitivam*
 usque Animæ partem se exerentis, οὗν Θεῷ
 breviter admodum expediemus. Qui per
Christi pro nobis *Crucifixi* vitam mundo e-
 moritur,

moritur, calamitates omnes, durissima fatorum tela, pro *Clavis* habet, quibus *Cruci* affigit *Carnem* suam: Atque adeo turbidâ, ac omnimodè molestâ Cupidinum Mundanarum agitatione cessante, vel ipsa *Sanctorum* caro lætatur Mundo *crucifixa*, ab infinito lumine illustrata *Rationis* imperio subiecta. Quid mihi velim, vix aliquis intellexerit, nisi qui & sentiet.

Sic *rudi* (ut aiunt) *Minervâ* depinxi veram, ac vivam *CHRISTIANI* letantis, utramque *Fortunam* in omne gaudium sibi procreandum vertentis, effigiem. *Rudi*, inquam, *Minervâ*, & paucis verbis, at verè quidem de rebus maximis locutus sum.

Fœlices ter, & ampliùs, qui suavissimam hanc gustant veritatem. Quàm sit Beata illius vita, qui — “Virtutem amplectitur ipsam Præmia si tollas —” vidit *Claudianus*: virtutis quasi exultans amplexibus, sic ille cecinit *Genium heroicum*:

“*Ipsa quidem virtus pretium sibi: solaq; latè*

“*Fortune securâ nitet, nec fascibus ullis*

“*Erigitur, plausuve petit clarescere vulgi.*

“*Nil opis externa cupiens, nihil indiga laudis,*

“*Divitiis animosa suis, immotaq; cunctis*

“*Casibus, ex altâ mortalia despicit arce.*

Qualia

Qualia scripsisset si *verè Christianam* vivendi Rationem penitus inspexisset clarissimus Poeta! Qualia dixisset *Epicurus* ille summi ingenii vir, qui sane Veritatis scintillam aspexit, cum dixit vitæ Beatæ finem esse *Μῆτε ἀλγὺν καὶ Σῶμα, μῆτε ταρῆσθαι καὶ θυμὸν*, Non dolere Corpore, ac Animo non perturbari: Qualia, inquam, dixisset ille, si *Apostolicum* hoc *Πάσθαι χαλῆν* intellexisset? quantâ indignatione profecutus fuisset istiusmodi literatos Homunculos, qui *Christianorum* pariter ac Philosophorum nomen sibi arrogantes nihili minùs studiosos se exhibent, quàm ut Mundana omnia ànimitus spernant, nec ad aliud Gaudium consequendum anhelent, quàm quod nobis commendat Apostolus, Sincerum, Perpetuum? Quàm pauci (tantum non dixeram quàm nulli) eorum, quos *Divites*, quos *Honorabiles*, quos viros Magnos vocamus, verum cognoscant Gaudere Gaudium!

(labōrat

“Ergo hominum genus incassum, frustra que

“Semper, & in curis consumit inanibus ævum;

“Nimirum quia non cognoscit quæ sit habendi

“Finis, & omnino quod crescat ver a volup-

(tas.

Multo magis τοῖς ἀλλοῖς φιλοσόφοις, & φιλοσοφῶν (ut Sancti Gr. Nazianzeni verbis utar) *Lucretiana* ista conveniunt, quàm ipsi *Lucretio*: nam quicquid iste immortalē esse Animum ignorans de verâ Hominis Voluptate sensu, vix dignum est, quod vel pro minimâ habeatur *Gaudii Christiani* umbrâ: attamen fatendum est Altissimum Ingenium sapuisse aliquid voluptatis percipiendæ in spernendis Divitiis, Honoribus, atque iis, quibus inhiat adeo maxima pars hominum Voluptatibus. Suavia illa quæ cecinit Poeta hic ingeniosissimus, quia in iis cernitur aliqua *Veri Gaudii* imaginacula, recitare juvat:

“ Suave mari magno turbantibus æquora
ventis

“ E terrâ magnum alterius spectare laborem,

“ Non quia vexari quæquam est jucunda
voluptas,

“ Sed quibus ipse malis careas quia cernere
suave est;

“ Suave etiam belli certamina magna tueri

“ Rex campos instructa tui sine parte pericli:

“ Sed nil suavius est bene quàm munera tenere

“ Edita doctrinâ sapientum templa serena,
&c.

Nobis

Nobis etiam arridet egregium Epiphonēma,

“ O miseras hominum mentes, ô pectora cæca!

“ Qualibus in tenebris vite, quantisque periculis

“ Degitur hoc ævi, quodcumque est? nonne
videre est

“ Nil aliud sibi Naturam latrare, nisi ut
cum

“ Corpore sejunctus dolor absit, mente fruatur

“ Jucundo sensu, curâ semota, metuque?

Nihil æquè valet ad Firmandam, aut Recup-
randam Corporis sanitatem, ac Temperantia
Christiana, & placida illa Phantasiæ, seu
Imaginationis temperies, quæ Gaudium spiri-
tuale comitatur: Verè Philosophicum est illud
Platonis: *ψυχὴ ἀγαθὴ τῇ αὐτῇ ἀρετῇ σῶμα
παρῆχει ὡς οἶοντος βέλτιστον.* De Republ. L. 3.
Proverbio sacro maxime consentaneum, VI-
TA CORPORIS COR SANUM:
cujus veritatis testem se præbet etiam Siraci-
des Eccl. 1. 12. *ὁ βέλτερος τῆς ψυχῆς καρδιάς, καὶ
δύσκει ἐν πειρασμοῖς, καὶ χαρὰν, καὶ μακάριον βίου.*
Atque inevitabiles omnes Corporis dolores
Animo Christiano cedunt in auxilia ad
amovendam unicam proprii doloris cau-
sam, scilicet ipsius Animi Pravitatem, seu
iniquam temperiem: Tali animo Mors ipsa

Corporis fit transitus ad Gloriosam Vitæ suæ interminabilis Perfectionem.

Ad cœlestem hanc tranquillitatem Terris jactatos Animos, ad delicias *Intellectuales sensibus* dedita Animalcula, quæ tamen *Rationalia* vocantur, ad Vitam Æternam Curis inanibus se magis, magisque indies fatigantes, Ærumnis gravissimis lassatos Mortales sub ingenti peccatorum pondere in Gehennam ruituros vocantem audiamus JESUM Nostrum, Matth. 11. 28, 29, 30. "Venite
 "ad me omnes qui fatigati estis, & onerati,
 "& ego faciam ut requiescatis. Attollite
 "jugum meum super vos, & discite à me
 "quod mitis sim, & humilis corde: & in-
 "venietis requiem animabus vestris. Ju-
 "gum enim meum facile est, & onus me-
 "um leve est. Jugum meum, &c. Hunc tex-
 tum explicans de *Christiano* sic loquitur clar-
 rissimus *Hammondus* Noster: "Unamquam-
 "que antiquorum Philosophorum sectam
 "spoliavit, à singulis diripuit, quod maximè
 "quisque in deliciis habuit: à Sceptico
 "ἀδιαφορίαν, à Stoico μὴ ποιεῖν τραγῳδίας,
 "Tragicè non queritur *Tragica* quantacun-
 "que perpeffus fit, ab *Epicuro* γαλήνην, pla-
 "cidam ac serenam Animi temperiem, cui
 "acquirendæ per omnem Philosophiæ cur-
 "sum

“sum incubuit, tantâ voluptate abundanti,
 “ut & adhuc ille quasi porcus ingluvie for-
 “didus existimatus sit, non aliam ob ratio-
 “nem, quàm ob quærendas eas Animi
 “placidè componendi causas, quæ alias vo-
 “luptates omnes longè superant: Ostenta-
 “tiones inquam, & Fastus isti, Somnia
 “ista Philosophorum, ac Spes evanidæ
 “*Christiano* cedunt in *Rem* verè acquisitam,
 “nempe hujusmodi *Epicurismum*, quem Fi-
 “des, & sola Fides se nobis præstare polli-
 “cetur. Ad sacras literas redeamus: J E S U
 Nostri Spiritu excitatus sic olim clamavit
 Propheta *Evangelicus*: “Heus quisquis
 “sitit, venite ad istas aquas, &c. *Isai.* 55. 1, 2.
 Eodem spiritu adductus suaviter cecinit
 Nobilissimus Boetius: utinam nos homines
Feris quandoque *ferociores* emolliat hic
Orpheus, & *Agno DEI* tractabiles reddat.

“*Huc omnes pariter venite capti,*
 “*Quos fallax ligat improbos catenis*
 “*Terrenas habitans libido mentes.*
 “*Hic vobis requies erit laborum,*
 “*Hic portus placidâ manens quiete.*

Hæc *Seneca* verba Doctrinæ Christianæ de
Vero Gaudio maxime consentanea præterire
 haud æquum videtur. Pudeat Christianos

suavissimam hujusmodi Veritatem non
gustare, toto studiorum cursu non expri-
mere, quam luculenter adeo stylo designat
Ethnicus, Epist. 23. “Ego verò aliquid,
“quod & mihi & tibi prodesse possit, scri-
“bam. Quid autem id erit, nisi ut te ex-
“horter ad bonam mentem? Hujus fun-
“damentum quod sit, quæris? nè Gaudeas
“vanis. Fundamentum hoc esse dixi?
“Culmen est. Ad summa pervenit, qui
“scit quo Gaudeat, qui Felicitatem su-
“am in aliena potestate non posuit. Solici-
“tuse est, & incertus sui, quem spes aliqua
“proritat; licet ad manum sit, licet non
“ex difficili petatur, licet illum nunquam
“sperata deceiverint. Hoc ante omnia fac,
“mi Lucili, Disce Gaudere. Existimas me
“nunc detrahere tibi multas Voluptates,
“qui fortuita submoveo, qui spes, dulcissima
“oblectamenta, devitandas existimo? imò
“contrà. Nolo tibi unquam deesse lætiti-
“am. Volo illam tibi domi nasci: nasce-
“tur, si modo intra te ipsum sit. Cæteræ
“hilaritates non implent pectus, sed fron-
“tem remittunt: leves sunt: nisi forte tu
“judicas illum *Gaudere* qui ridet. Animus
“debet esse alacer, & fidens, & super om-
“nia erectus. Mihi crede, res severa est
“verum

“ verum Gaudium. An tu existimas quen-
“ quam soluto vultu, &, ut isti delicati lo-
“ quuntur, hilari oculo mortem contem-
“ nere? paupertati domum aperire? Vo-
“ luptates tenere sub fræno? meditari do-
“ lorum patientiam? Hæc qui apud se ver-
“ fat, in magno Gaudio est, sed parum
“ blando. In hujus gaudii possessione esse
“ te volo. Nunquam deficiet, cum semel unde
“ petatur, inveneris. Levium metallorum
“ fructus in summo est; illa opulentissima
“ sunt, quorum in alto latet vena, assidue
“ plenius responsura todienti. Hæc quibus
“ delectatur vulgus, tenuem habent, &
“ perfusoriam voluptatem: & quodcun-
“ que investitium Gaudium est, funda-
“ mento caret. Hoc de quo loquor, ad
“ quod te conor perducere, solidum est, &
“ quod plus pateat introrsus.

Da veniam mihi, erudite Lector, *Seneca*
verbis recitandis diutius immoranti: nam
exprimunt sanè Animi mei sensa: pergo
itaque tibi propinare, quæ Ego gustavi dul-
cissima, *Epist. 59.* “ Nunc ipse te consule:
“ si nunquam mœstus es, nulla spes animi
“ tuum futuri expectatione sollicitat, si per
“ dies, noctesque par, & æqualis Animi tenor
“ erecti, & placentis sibi est: pervenisti

“ad humani boni summam. Sed si appetis
“voluptates, & undique, & omnes: scito
“tantum tibi ex sapientiâ, quantum ex
“gaudio, deesse. Ad hoc cupis pervenire,
“sed erras, qui inter divitias illuc venturum
“esse te speras. Inter Honores Gaudium,
“id est, inter sollicitudines quæris? ista quæ
“sic petis, tanquam datura lætitiâ, ac
“voluptatem, causæ dolorum sunt. Omnes,
“inquam, illi tendunt ad gaudium: sed
“unde stabile, magnumque consequantur,
“ignorant. Ille ex Conviviis, & Luxu-
“riâ: ille ex Ambitione, & circumfu-
“sâ Clientium turbâ: ille ex Amicâ: ali-
“us ex studiorum liberalium vanâ ostenta-
“tione, & nihil sanantibus literis. Omnes
“istos oblectamenta fallacia, & brevia deci-
“piunt: sicut ebrietas unius horæ hilarem
“insaniam longi temporis tædio pensat:
“sicut plausus, & acclamationis secundæ
“favor, qui magnâ sollicitudine & partus
“est, & expiandus. Hoc ergo cogita, hunc
“esse Sapientiæ effectum, Gaudii æqualita-
“tem. Talis est sapientis animus, qualis
“Mundi status super Lunam: semper illic
“serenum est. Habes ergo, quare velis Sa-
“piens esse: quia nunquam sine Gaudio
“est. Gaudium hoc non nascitur, nisi ex
“Vir-

“Virtutum Conscientiâ. Non potest Gau-
“dere, nisi Fortis, nisi Justus, nisi Tempe-
“rans.

Philosophi estis, Academici: *Philosophum*
audiatîs, DISCE GAUDERE:
CHRISTIANI estis, CHRISTI
Jugum super vos attollite: Requiem anima-
bus vestris invenite: *Semper Gaudete.*

Differ-

Differtatio Quarta.

I Joh. 4. 7.

Dilecti, Diligamus alii alios.

DE *Amore* erga DEUM exercendo per *Infinite* ejus *Bonitatis* in CHRISTO nobis communicandæ intelligentiam, atque inde profluente *Gaudio perpetuo* hactenus peroravi: Sequitur de Hominibus diligendis hoc in loco habenda oratio: nam qui DEUM amat, seu diligit, necesse est ut & Homines diligit Universos. Hæc est (inquit *Johannes*) *Charitas DEI* ut Mandata ejus servemus, I Ep. 5. 3. Mandat autem (Luc. 10. 27.) ut diligas Proximum tuum (nempe quemcunque hominem) ut te ipsum. Quod ad illum Affectum spectat quem *Amorem Complacentiæ* vocant, ex præcedentibus Orationibus satis constat, eum deberi cunctis Hominibus, quatenus ex DEO sunt, i. e. sub quacunque ratione, nisi in quantum Peccatores simpliciter, considerantur: hoc autem respectu Odium merentur, & DEI, & Nostrum: sed ut Peccatores

catores *Pœnitentes* aut pœnitentiæ agendæ *Capaces* Amorem, seu *Charitatem*, tam *Complacentiam*, quàm *Benevolentiam* à nobis postulant, seu meritò sibi vindicant.

Ut quicquid ad Homines diligendos spectat rite perspiciamus, sentiamus DEUM in CHRISTO nos obligantem ad omnimodum Amorem legitimum legitimè, i. e. in ordine ad DEUM, erga omnes exercendum pro ratione variæ singulorum & Amari capacitatis. Per eam & Amari capacitatem intelligo inprimis *Charitatem* seu amorem erga DEUM, atque homines divinitus infusum, deinde *Σχίσαι*, seu Necessitudines Naturales, Politicas, Ecclesiasticas, Oeconomicas. Postremò Dotes Naturales, utpote eximias Memorix, aut Ingenii Vires, & omnia Animi Ornamenta acquisita: atque etiam qualemcunque hominum quoad Res externas conditionem, sive illi rebus in arduis, sive in prosperis versentur. “Dum tempus opportunum habemus” (inquit Apostolus *Epist. ad Galatas* 6. 10.) “simus Benefici erga omnes, maximè verò” “erga domesticos fidei. Nimirum *Christianorum* Benevolentia erga homines augetur prout in iis spectatur auctior capacitas Benevolentix Divinæ per Christum effusæ:
Qui

Qui Deum *Actu* diligunt, *Omnia* iis *cooperantur in Bonum* : qui verò Charitatis vacuos *Animos* gerunt, his omne Bonum *Alicnum* est, nec illis debetur Benevolentia nostra, nisi in quantum *Charitatis*, seu *Naturæ Divinæ* capaces esse videantur.

Syncera dilectio secundum *Σχέσις* naturales exercita Vis, & Norma est diligendi secundum cæteras prædictas Necessitudines : nempe *Superiores* Politici, Ecclesiastici, Oeconomici, *Inferioribus* suis universis, & singulis affectum Paternum ~~debetur~~ debent; his Inferiores Filialem; sibi invicem Æquales Fraternum. At, eheu! ubi gentium cernenda est hæc dilectio? mihi sanè videtur maxima pars hominum vel eo nomine *Superiores* odio habere, quòd iis debeatur *Reverentia*. Fallit eos egregiè *Mendaciorum Pater* aliquo hujusmodi *sophismate* : Amor pares invenit, aut facit : Pares esse nolunt, ideoque amorem respuunt. Dum Hominibus propter D E U M subjici nolunt superbientes homunculi, ipsi subjiciuntur D I A B O L O, Naturam exuunt humanam, belluinà pejorem induunt. Convenit certè nostra omnium Experientia cum Dictis istis ingeniosissimi, doctissimi, generosissimi *Zenophontis* : Πάσας ἀγάλας ἰδοῦντες οὐδὲν μᾶλλον

λοι ἰθαλίσας ποίθειν τοῖς νομιῦσιν, ἢ τὸς
ἀνθρώπους τοῖς ἀρχασι. “Videre videbamur

“Greges omnes lubentiùs Pastoribus suis
“parere, quàm Homines Magistratibus.

χαλεπώτερά οἰσιν αἱ ἀγέλαι πᾶσι τοῖς ἄλλοις,
ἢ τοῖς ἀρχασι τε αὐτῶν, καὶ ὀφειλεμένοις ὑπ’

αὐτῶν. Ἀνθρώποι δὲ ἐπ’ ἐδέναι μᾶλλον συνίσταν-
ται, ἢ ὅτι τέτυκται, ἔς ἂν αἰσθάνηται ἀρχὴν αὐ-

τῶν ὀπιχρῶνται, “Imo, inquit, quibusvis aliis
“infestiores sunt Greges, quàm iis, qui &

“imperium in eos habent, & emolumenta
“ex iis capiunt: quum Homines in nullos

“majori coeant impetu, quàm quos in se im-
“perium affectare sentiunt.

Qui verò Hominibus propter DEUM
debitam *Reverentiam* præstat, nempe ve-
ram, ac genuinam *Superioritatis* eorum
Agnitionem, *Humilitas* ejus, i. e. sui *De-*
missio, *aliena superioritatis* agnitio, in ipsam
DEUM ultimò redundat. Quod ad Ho-
mines spectat, omnes *Natura Divina* parti-
cipes, dum ad *interiorem Hominem* respicit,
Fratres vocat, sibi quodammodo *Pares* esse
agnoscit: Improbos autem fallacem *Volup-*
tatis umbram captantes, quantâcunque *O-*
pulentiâ, quantâcunque *Potestate* præditos,
clarissimis *Honorum Titulis* insignitos, se-
ipsos longissimè *inferiores* esse generoso qui-
dem,

dem, ac planè *Heroico* Dolorè percussus sentit. Horum miserescit, non sui piget, quâcunque ipse premitur inopiâ, quâcunq; Infamiâ; cui verè Beato nil Magni, nisi in DEO OPT. MAX. æstimanti, argutissimi Poetæ (*Marialis*) verbis quemcunque sui similem adhortari liceat.

“ *Miserere tu Fœlicium*

“ *Veròq; fruerè non Superbus Gaudio.*

Si quis erga Sanctos *Amorem Complacentia*, erga omnes *Benevolentiam* aliquam exerceat, omnium ille Bonis omnibus perfruitur: iis præcipuè quæ Animi Bona appellamus. Quod ad *Sanctitatem* spectat, ex supra dictis satis constat singulis DEI amatoribus eam placere in aliis spectatam, quocunque modo sese exerentem: Quibus etiam eos *Placere*, seu *Jucundos* esse per omnia Bonorum suorum indicia, qui Dotes aliquas naturales eximias, & quævis acquisita Animi ornamenta, quascunque artes, & scientias factis, vel dictis præferunt, nullus dubitat, qui feridè ac profundè cogitat, reverâ esse illa omnia *Pulchri infiniti Effluvia*. Qui verò (ut verbis *Ciceronianis* utar, ad *Atticum* L. 7. Ep. 11.) *nè umbram unquam se καλὸν viderint*, istos sanè

fanè si non omnium hominum, at saltem inimicorum *Bona* perspecta se *Male* habere faciunt: Sentiunt quodammodo aliorum opulentiam suam esse pauperiem: aliorum encomia sui vituperia: quippe in se convolutæ humi jacentes, sordidæ animulæ, sacræ KOINONIAE ignaræ, scilicet illius Sanctorum Privilegii, quo fit ut illis OMNIA cum DEO, & Angelis ejus, Sanctisque omnibus communia sint; hujus inquam KOINONIAE ignaræ, sordidæ Animulæ, Mundi amplexibus arctatæ, quod aliis attributum cernunt, id sibi esse detractum existimant.

Jam breviter ostendemus Externam Hominum Conditionem debitæ Charitatis erga ipsos exercendæ Occasionem nobis suggerere.

Calamitatis alienæ sensum *Christianorum* viscera commovere nemini non innotescit. Si Pii sint, ac verè *Christiani* quos magnis vitæ incommodis conflictantes videmus, clarissimas esse illos agnoscimus *Christi Patientis* imagines, Amore summo prosequimur, & quodammodo *Veneramur*. Immo hanc *venerabile* quiddam esse ingentem *Calamitatem* sentiebant aliqui *Ethnicorum*. Res est *sacra Miser*, inquit *Seneca*.

Homerus

Homerus ille ("a quo, ceu fonte perenni
 "Vatum Pieriis ora rigantur aquis) *Priami*
Filium Achilli ipsum interempturo his verbis
 supplicantem inducit *Iliad.* φ.

Γυνῆμαι σ' Ἀχιλλεύ, σὺ δὲ μ' αἰδέο, καὶ μ'
 ἐλέησον.

Ἀντί τοι εἰμ' ἰκέταο δούτερες Ἀιδόλοιο.

"Genua tua tango, Achilles, tu autem me
 "Venerare: loco tibi sum Supplicis (ô No-
 "bilis) Venerandi. Nimirum viris hisce
 sagacioribus Genio eximio præditis *Hero-*
um quodammodo Proprium esse videbatur
 Ingenti aliquâ Calamitate urgeri. Hinc
 illa *Seneca* (*L. De Providentiâ*) "Prospera
 "in plebem, ac vilia ingenia deveniunt:
 "at Calamitates Terroresque mortalium
 "sub jugum mittere proprium magni viri
 "est. Sin Impii meritò habeantur, quos
 Fatis acerbis agitados cernimus, nos *miseret*
 eorum tam propter *Miseras* Temporales,
 quàm propter illa, in quibus versantur,
 Mortis Æternæ Pericula: Et nos sanè pluri-
 mum Juvat, si quâ in re illos Adjuvare posse
 videamur. Hic etiam notandum est, quod
Christiana Benevolentia Occasio fit hoc ip-
 sum *Displacencia* objectum, nempe vel maxi-
 ma

ma inimicorum *Malevolentia*. “Dico vobis,
 “inquit Christus Dominus Noster, diligite
 “Inimicos vestros. At dixeris fortasse, Non-
 ne Piis omnibus Necessitas incumbit ipsam
 inimicorum suorum Inimicitiam Odio pro-
 sequendi? Imò sanè: summo Odio ipsam
 prosequuntur, sed præcipuè hanc ob ratio-
 nem, quia ipsis Inimicis nocet. Sancti viri
 diligendo Inimicos vincunt Seipsos, Hostes
 sibi omnium infensissimos.

“*Fortior est qui se, quàm qui fortissima vincit*

“*Mœnia —*

Qui DEUM diligit propter Seipsum, &
 Homines universos propter DEUM, is
 sanè quicquid ex DEO est in quibuscun-
 que Hominibus, Probat, Amat, pro Pabulo
 Charitatis inextinguibilis sibi arripit. *Plu-*
tarchus in hoc *Paradoxo* explicando, mag-
 nam utilitatem ex Inimicis esse percipien-
 dam, “Videtur mihi, inquit, Doctissimo
 “*Raynoldo* interprete, quo nihil habent ini-
 “micitiæ magis noxium, id, si animum ad-
 “verterimus, utilissimum futurum: quid
 “illud tandem est? Inimicus semper Vigi-
 “lans, tanquam ex insidiis observat quid
 “agas, & ansam quærens perlustrat undiq;
 E vitam

“vitam tuam. Et quemadmodum Vul-
“tutes ad cadaverum odores advolant, syn-
“cera, ac sana Corpora non sentiunt; sic in-
“firmis vitæ partibus, & vitiosis, & affectis
“commovetur Inimicus; in eas prosiliunt,
“qui nos odêrunt, eas contrectant, atque
“adeo conserpunt. Hoc igitur commodum
“ad te redundat, quod circumspicere viven-
“dum est, tibi que ipsi attendendum, &
“neque faciendum quicquam negligenter,
“& incautè, nec dicendum; sed conser-
“vandi semper, tanquam in accuratâ victus
“ratione, Mores incorrupti, quos nemo me-
“ritò reprehendat. Ejusmodi namq; cau-
“tio, quæ comprimit affectus Animi, &
“Animum in se colligit, studium & pro-
“positum vitam inculpatam ac integram
“agendi nobis ingenerat. Saluberrima *Plu-
tarchi* Sententia ad sanandas Mentis *Ægras*
sæpissimè adhibenda est: nempe hæc facil-
lima est Inimicis nostris Ignoscendi via,
Sæpius cogitare, quàm Bonum sit nobis
Exerceri Odiis, & Inimicitis acerbissimis.
Hujusmodi est ista *Christianorum* in hoc Sæ-
culo *Militantium Victoria*, *Inimicos diligere*,
ut Indicium sit certissimum *Triumph* in Cœ-
lis Futuri in *Æternum*. Jam forsan de-
sideret aliquis Animi mei sensa de *Relatione*
illâ,

illa, quam *Amicitiam* vocamus: Dico igitur eam nil aliud esse quàm *Christianam* erga *Christianos* Dilectionem, Dictis, Factisque prout se offert Occasio explicatam. Huic *Amicitia* definitioni nequaquam non convenit quod de eà antiquorum Philosophorum præstantissimi senserunt: mihi itaque operæ pretium esse videtur quorundam eorum, nempe *Aristotelis*, *Pythagora*, *Ciceronis* sententias referre. At infra *Amicitiam* Nostram tantùm subsidunt eorum cogitata, quantum infra *Charitatem Christianorum* præstantissimæ *Ethnicorum* Virtutes; quæ verò quales fuerint, quo pretio apud DEUM æstimatæ, non Meum est dissidere. *Aristoteles* (ut testatur *Laertius*) *Amicitiam Mutuam Benevolentia* *Æqualitatem* definiebat. Τὴν Φιλίαν ὡλεσατο ἰσότης Εὐνοίας ἀντιστοχῶν. Nempe hæc fuit *Philosophi* sententia, unum Amicorum Amorem ab altero non maiorem sibi vendicare, quàm illi se debere agnoscit. Τελοῖα ἐστὶν (inquit idem clarissimus *Stagirites* *Ethicorum* L. 8. c. 3.) ἡ τῶν ἀγαθῶν Φιλία, κατ' ἀρετὴν ὁμοίων, ὅτοι γὰρ τ' ἀγαθὰ ὁμοίως ἀλλήλοις βέλονται ἢ ἀγαθοί. “ Perfecta est “ Bonorum amicitia, & eorum qui virtute “ sunt similes: hi enim mutuò sibi Bona “ similiter volunt, quatenus sunt Boni. Ca-

pite quarto ejusdem Libri, οἱ ἀγαθοὶ, inquit, ἄλλοις ἀγαθοίς. Hic, atque alibi etiam abunde testatur se perspexisse veritatem istam, Viros Bonos seu Virtute præditos in mutuam sui cognitionem, & societatem coalescentes sibi invicem *maximè Placere*, Jucundissimam sibi invicem suam præstare vivendi rationem.

Pythagoricos pro summo habuisse *Amicorum* Officio se invicem Meliores, nempe magis magisque indies D E O similes facere, his verbis testatur *Jamblicus*: Postquam de eximiis quorundam *Pythagoricorum* erga Socios Amoris indicia quoad Res Externas prolat' s' fusiùs disseruisset, Καλὰ μὲν ἐν, inquit, de Vitâ *Pythagoræ*, C. 33. καὶ ταῦτα τῆς φιλίας τεκμήρια. πολὺ δὲ τέτων θαυμασιώτερον ἢ τὰ πρὸς τῆς κοινωνίας πρὸς θεῶν ἀγαθῶν, καὶ τὰ πρὸς τῆς τῆ νῦ ὁμονοίας, καὶ τὰ πρὸς τῆς θείας ψυχῆς παρ' αὐτοῖς ἀφοειδόντα. παρήγγελον γὰρ θέμα ἀλλήλοις μὴ διασπᾶν τὸν ἐν ἐαυτοῖς Θεόν. ἐκ ἐν εἰς Θεοκρασίαν τινα καὶ τὴν πρὸς τὸν Θεὸν ἐνωσιν, καὶ τὴν τῆ νῦ κοινωνίαν, καὶ τὴν τῆς θείας ψυχῆς ἀπέβλεπεν αὐτοῖς ἢ πᾶσα τῆς φιλίας ἀποδὲν δι' ἐργασίαν καὶ λόγον. “ Pulchra igitur, & eximia hæc “ quoque sunt Amicitia indicia: multò autem “ hisce ea admirabiliora erant, quæ de “ Com-

“ Communionem Sanctorum Bonorum, & de
 “ mentis concordia, & de Animâ Divinâ
 “ apud ipsos definita, determinataque erant.
 “ Admonebant enim sese mutuo, nè Deum
 “ qui in ipsis esset, discerperent. Itaque in
 “ Divinam quandam Temperiem, atque
 “ Unionem cum Deo, & mentis animæque
 “ communionem apud ipsos universum A-
 “ micitiæ studium tum factis, tum dictis
 “ respiciebat.

Credo autem hujusmodi Notiones haud
 aliter concepisse *Ethnicorum* Animos, nisi
 modo aliquo *Extraordinario* à *Patre Lum-*
inum benignè Illustratos; nec possit nostram
 evertere sententiam *Audacissima Ignoran-*
tia literatâ Verboseitate suffulta. Nè tentent
Christiani *Ethnicos* probare nullam habuisse
Veri Dei Notitiam, sed pudeat eos Magna
 hæc, ac planè cœlestia tam rarè, aut nunquam
Operibus ostendisse, quæ de Honoribus, &
 Divitiis spernendis, de Voluntate nostrâ
 DEO semper in omnibus subjugandâ, quæ
 denique de Hominibus, etiam Inimicis Di-
 ligendis, clarè adeo *Ethnici* scripserunt.
 At, inquit, pauperculi *Stoici* sunt, nullius
 pretii homunculi, qui magnanimè adeo
 profitentur se contemnere Opulentiam.
 Apage Mendacia! *Marcus Aurelius Anto-*

ninus tam Ingenii, & Doctrina Princeps, quàm Romanorum Imperator, testatur se, summas inter Opes, summis auctum Honoribus, hoc verum perspexisse, Nihil intus habere veræ Fœlicitatis summam Opulentiam, aut Potestatem, vel ipsam Imperatoriam. Sed quorsum ego? Jam alium *Ethnicum*, nempe *Ciceronem de Amicitia* sanctè quodammodo loquentem audiamus. “Ego vos hortari tantum possum, inquit ille, ut Amicitiam omnibus rebus humanis anteponatis, nihil est enim tam naturæ aptum, tam conveniens ad res vel secundas, vel adversas. Sed hoc primum sentio: Nisi in Bonis Amicitiam esse non posse.

“Est autem Amicitia nihil aliud nisi omnium Divinarum, Humanarumque rerum cum Benevolentia, & Charitate summâ consensio.

“Quid dulcius quàm habere quicum omnia audeas sic loqui, ut tecum? quis esset tantus fructus in Prosperis rebus, nisi haberes, qui illis æquè ac tu ipse, gauderet? Adversas verò ferre difficile esset sine eo, qui illas gravius etiam, quàm tu, ferret.

“Cum plurimas, & maximas Commoditates Amicitia contineat, tum illa nimirum præstat

“præstat omnibus, quo bonâ spe prælu-
 “in posterum; nec debilitari animos, aut
 “cadere patitur. Verum etiam Amicum qui
 “intuetur, tanquam Exemplar aliquod
 “intuetur sui. Quocirca & absentes ad-
 “& egentes abundant, & imbecilles valent,
 “& quod difficilius dictu est, Mortui Vi-
 “vunt: tantus eos Honos, Memoria, Desi-
 “derium prosequitur Amicorum: ex quo
 “illorum Beata Mors videtur, horum Vita
 “Laudabilis.

“Ubi eos inveniemus, inquit, qui hono-
 “res, Magistratus, Imperia, potestates, opes
 “Amicitia non anteponant?

Imò Philosophè, ubi eos inveniemus, qui
 non Amicitiam, quasi *Chimaram* quandam,
 seu *Inane Vocabulum* ludibrio habent? ἀλλὰ
 ταῦτα μὲν (ut *Simplicii* verbis utar) τῇ περὶ
 τὴν φιλίαν ἐπιθυμίᾳ κεχαιῖσθαι, τῇ καὶ ἐν ὁλί-
 γοις αὐτὴν ἐπισμένη ὁρᾶν διὰ τὴν παντελῆ χε-
 ῖδον αὐτῆς ὑπὸ τοῦ καθ' ἡμᾶς ἀνθρώπων ἀναχώ-
 ρησιν. “Atque hæc Amicitia desiderio tri-
 “buta sint, quam vel in paucis cernere op-
 “tabile est, nostrâ ætate propemodum
 “penitus è vitâ mortalium profligatam.
 Si vero, candidissimi Lectores, in Terris
 degentes cum paucis admodum, seu potius
 nullis, omnibus numeris absolutum Amici-

tiae foedus inire possimus; at saltem Amicitiae Fundamentum, *Synceram Dilectionem* firmiter teneamus: Quicquid *Ex Deo* est in quocunque Homine Ardeamus, Celebremus, arctissimo stringamus amplexu. Sic tandem nos omnes relictâ hâc vitâ densissimis ignorantiae tenebris undique obvolatâ, in luce clarissimâ apud DEUM OPT. MAX. repositi, summâ Amicitia cum Gloriosissimo, Incomprehensibili *Triuno Numine*, cum Angelis Ejus, Sanctisque omnibus in Æternum perfruemur. Cujus Beatitudinis Inenarrabilis Expectatione gaudentes Hymnum Angelicum Cantemus, Ἀόξα ἐν ᾿Υψίστοις Θεῷ καὶ ὁμῇ γὰρ Εἰς αὐτόν, ἐν ᾿Αρχαῖς τοῖς

Eudoxia.

Differ-

Differtatio Quinta.

Matth. 5. 5.

Beati Mites, quoniam ipsi possidebunt Terram.

S Acri hujus *Apophthegmatis* sensum, nempe *Christianos*, eosque solos vel in hac vitâ *Fœlices* esse, ex præcedentibus *Sermonibus* facile est colligere, *Beati Mites*, nempe *Agno DEI* con-
similes, *Verè Christiani*, quoniam ipsi possidebunt *Terram*. Totus *Terrarum Orbis* sit quodammodo *Eorum Possessio*, cum nil sit aliud *Semper Gaudere*, quàm *Rebus* omnibus, ac *Eventis* per *Mysticam* illam in *Evangelio* prædicatam cum *DEO* in *CHRISTO Unionem*, perfrui; Atque adeo pro *Bonis* *Nostreis* *Omnia* habere, firmiter tenere. Si quis obijciat, *Dixit Apostolus*, "Si in hac
"solum vitâ speramus, miserrimi omnium
"hominum sumus, *I Cor. 15. 19.* Quomodo itaque verum sit *Christianos*, eosque solos vel in hac vitâ *Fœlices* esse? Respondeo, *Non aliter Fœlices* sunt in hac vitâ *Christiani*,
nisi

nisi Sperando se esse futuros DEO INCARNATO Undiquaque Conformes,
 “Quoniam Videbunt Eum, sicut EST,
 “1 Joh. 3. 2. Et, v. 3. Quisquis habet
 “hanc Spem in Eo (inquit Apostolus) purificat se, sicut & Ille Purus est. A Puritate illa Animi Temperie planè Divinà jugiter effluunt in intima Animi penetralia hujusmodi Gaudia, ut eadem capienti quicquid unquam adversi contigerit, in Perpetuam Gaudii amplioris Occasionem evadat: scilicet CHRISTIANI *Proprium est, De iis quæ patitur Gaudere*; Illi fideliter inhaerendo, Qui LUCEM Fecit ex TENEBRIS Oriri, qui OMNIA Produxit ex NIHILO. CHRISTIANORUM esse Omnia quæ sunt in Cœlis, aut in Terris, Omnia Illis tam *Aspera*, quàm Jucunda in emolumentum cedere his verbis clarissime ostendit Apostolus, 1 Cor. 3. 21, 22, 23.
 “Cuncta vestra sunt. Sive Paulus, sive
 “Apollo, sive Cepha, sive Mundus, sive Vita,
 “sive Mors, sive Præsentia, sive Futura, omnia vestra sunt. Et vos *Christi, & Christus*
 “DEI. Nempe qui per *Hominem Christum Jesum, Dominum Suum* DEI Fiunt Possessio, Illis se DEUS Possidendum exhibet, in quo sunt Omnia. *Cuncta in Illo subsistunt*, inquit

quid Sanctus Gregorius in Expos. in B. Job. c. 23. à quo creata sunt. *Quae Creatae sunt,* inquit Sanctus Hieronymus in Epist. ad Damasum, *etiamsi videntur Esse, non Sunt, quia aliquando non Fuerunt: Et potest rursum non Esse, quod non Fuit.* DEUS Solus, qui Aeternus est, hoc est, qui Exordium non habet, Essentiae nomen verè tenet. Nec ipsas Ethnicorum Scholas prorsus latuerunt hujusmodi Νοήματα: hinc Πολυθρίλλητον istud, Σοφὴ Πάντα εἶναι. At verò cum nonnulli qui Christianos se esse profitentur, hujusmodi veritatem quasi Commentum Ethnicorum pro Ludibrio habeant, ipsa SALVATORIS nostri verba Textus hujus Beati Mites — Sensus intimos explicantia in medium proferemus, Marc. 10. 29, 30. “Respondens
 “Jesus ait, Amen dico vobis, Nemo est qui re-
 “liquerit Domum, aut Fratres, aut Sorores,
 “aut Patrem, aut Matrem, aut Filios, aut A-
 “gros propter me, & propter Evangelium,
 “Qui non accipiet centies tantum nunc in
 “tempore hoc, Domos, & Fratres, & Sorores,
 “& Matres, & Filios, & Agros cum persecu-
 “tionibus, & in saeculo futuro vitam Aeter-
 “nam. Hæc verba augustissima, & plena
 DEO, Doctissimum, Sanctissimumq; virum
 Thomam Jacksonum & Manaelum ad Eximia
 hæc

hæc Animi sui planè Divini sensa expri-
 menda, & in Libro suo cui Titulus *Justi-
 fying Faith* C. 27. S. 3. Posteris traden-
 da excitârunt. "Ut Ilylo, inquit, utar
 "Philosophico, Sicut ipsa Sanitas, seu recta
 "Corporis habitudo, sic multo potius Ani-
 "mi Sanitas, nempe quicquid pro nostro
 "habemus Gaudii, aut Hilaritatis intus
 "nobis exoritur; quod ad *excitandum* so-
 "lummmodo, aut *maturandum* Externa con-
 "ducunt. Sicut autem nulla potest esse
 "Ignis indigentia, nisi Claudis, aut Ignavis;
 "dum idem Calor, quem hic exhibet, ab
 "ipso Sole tam faciliè petendus sit, vel me-
 "lius procurandus à Motu proprio, seu fer-
 "vidâ Sanguinis, & Spirituum Agitatione:
 "Sic nec Damnum esse potest Amicis, O-
 "pulentia, & Honoribus privari, dum om-
 "nium illorum, quæ ullo modo ab iis pro-
 "venire queant, Solatiorum Florem, ac
 "Quintessentiam multo abundantius acci-
 "pere possimus, ab Animorum nostrorum
 "placidâ Fruitione, & Liberis Exercitiis,
 "seu Recto Facultatum optimarum Usu,
 "præcipuè Munerum in nobis Divinorum
 "Excitatione, quibus ipsi Christo Uniti su-
 "mus, Qui plus sanè cuilibet Fidei Animo
 "est, quàm *Hanna* fuit ille *Elkanah*, non
 "tantum

" tantum multis Filiis præferendus, sed Is
 " etiam in Quo, licet præter Eum nihil ha-
 " beamus, Justissimo Domini Titulo Om-
 " nia Possidemus. " Ut nihil habentes (de
 omnibus *Verè Christianis* loquens ait Apo-
 stolus (2 Cor. 6. 10.) & tamen Omnia
 " Possidentes. Eodem *Spiritu* adductus sic
 loquitur *Origenes*, τὸ Πιστὶ ἔλθῃ ὁ κόσμος καὶ
 χερμῶτων, τῷ δὲ Ἀπίστῳ ἡ Ὀβολός, *Philocal.*
 C. 26. Ejusdem Veritatis Testem *Prospe-*
rum habemus in Libro secundo de Vitâ Con-
 templativâ C. 16. " Quem Possidendi de-
 " lectat Ambitio, D E U M qui Possidet
 " Omnia quæ Creavit, expeditâ mente pos-
 " sideat, & in Eo habebit quæcunque ha-
 " bere Sanctè Desiderat. Sed dies me de-
 ficeret si omnia proferrem, quæ faciliè oc-
 currunt, *Patrum* Testimonia: Instar om-
 nium erit Sancti *Basilii* Sententia, qui in
 Operibus suis Veritatem istam, Verè Chri-
 stianos vel in hac vitâ Fœlices esse, *Veris Di-*
vitiis affluentes, hanc, inquam, *thesin Evan-*
gelicam summo Ingenii Acumine, Eloquen-
 tiæ Splendore, Sapientiæ pondere explica-
 vit, adornavit, confirmavit. Mihi sanè mil-
 lies repetita placebunt hæc verba quæ in
 Ejus *Homiliâ* de Gratiarum Actione oc-
 currunt. *ὅτι καὶ ἡ ἀπαρξὶς τοῦ κόσμου τῷ Πισ-*

ὁ πρὸς Κρίσαντον, &c. "Anima, inquit, quæ
 "semel se desiderio astrinxit sui Creato-
 "ris, jamque insuevit oblectare se tantæ
 "illius Pulchritudinis contemplatione, pror-
 "sus non finet vehemens illud Gaudium,
 "animique sui jucundissimam diffusionem
 "intercipi, aut immutari per multitudinem,
 "aut succedaneam Carnalium Affectionum
 "mutationem, quin ea potius quæ aliis mœ-
 "rorem afferunt, & tristitiam, in cumulum
 "sibi vertet, & accessionem Lætitiae. Humil-
 limè vos oro, & obtestor, Candidi Lectores,
 ut Totam hanc *Homiliam*, atque illam etiam
 cui Titulus *Quod DEUS non est Autor*
Mali sedulè evolvatis, Ultramque invenietis
 Dogmate Cœlesti, Curvis in Terras Animis
 Inviso repletam: inde abundantius hau-
 rietis *Dulcedinem* omnia quæ in hac vitâ
 gustamus Amara superantem, & Verè Dul-
 cia eadem facientem: Dulcia, inquam,
 nam pro Christo *κατωθὲν ἦν*, ut idem
 Testatur *Basilus* in Epistolâ suâ, (211) ad
Macarium, & *Joannem*. Pro Christo autem
 affliguntur, qui Fata Dura, horrida quocun-
 que modo à *Providentiâ Divinâ* sibi illata
 Animo verè *Christiano* patiuntur. De *En-*
laliâ Martyre Animum plusquam virilem
 gerente Virgine sic cecinit Nobilissimus
 Prudentius:

Prudentius. Πρεὶς Σιπάρων.

—— Trepidus

“ Terruit aspera Carnifices

“ Supplicium sibi dulce rata.

Quæ (Teste eodem Prudentio) hujusmodi
Sermone Tortorem aggressa est:

“ Ergo age, Tortor, adure, seca,

“ Divide membra coacta luto.

“ Solvere rem fragilem facile est;

“ Non penetrabitur interior

“ Exagitante Dolore Animus.

Fructuosum Martyrem Cruciatus Mortife-
ros jamjam subituro viros Adstantes sic
esse allocutum Testatur etiam Prudentius:

“ Non est, credite, Pæna quam videtis,

“ Quæ puncto tenni citata transit,

“ Nec Vitam rapit illa, sed Reformat.

Hujusmodi esse Fortitudinem Christianam
facile admittit Fides Nostra, cum Dogmata
ista Heroica protulerit vel Ethnicus Poeta
sub Personâ Catonis Milites suos Periculosas
Lybies Arenas ingressuros alloquentis,
Lucan. L. 9.

“—— Sag-

“ — *Serpens, Sitis, Ardor, Arena*

“ *DULCIA Virtuti: GAUDET*
Patientia Duris.

“ *Lætius est quoties magno sibi constat Ho-*
nestum.

Sic Rebus Adversis Fruuntur Mites. Quod
ad Honores, Voluptates, Opes spectat, eorum
Summitates, & Quintessentias sibi ingerunt.
Quis dubitet esse illos Verè *Honorabiles*, qui
ab ipso Cælo deducunt *Originem*, & DEUM
Patrem vocant? “ *Selectissimæ Voluptates,*
ut optimè Notavit supra laudatus *Jacksonus*
S. 3. C. 23. “ *quas Mundus & Caro*
“ *offerunt licet non essent Vetitæ, nec Con-*
“ *scientiæ stimulo obnoxia, Faces quodam-*
“ *modo esse eas existimare debemus; quas*
“ *Magnanimè respuere, aut sine illis in-*
“ *tegrâ Animarum nostrarum Possessione*
“ *gaudere, Delectationis istius, quam alii*
“ *in illis hauriendis percipiunt, quasi Flos, &*
“ *Quintessentia est.* Sic etiam respectu
Exterioris Hominis Mites, nempe *Sapientiæ*
Filii, facile evadunt *Opulentissimi*: nam
Imaginariam Exterminant Paupertatem,
quâ plurimi Mortalium miserè gravati per-
petuis *Ærumnis* succumbunt. Sunt autem
Pauca

Pauca admodum quæ Veram Paupertatem profligant :

Pauper enim non est, cui rerum suppetit Usus, ut cecinit Horatius. Et Rectè quidem Lucretius, Lib. 2.

— *“Corpoream ad Naturam pauca videmus
“Esse opus omnino, quæ demant quemque Dolorem :*

“Delicias quoque uti nullas substernere possint

“Gratius interdum neque Natura ipsa requirit,

“Si non Aurea sunt Juvenum simulachra per Aedes, &c.

“Nec calida citius decedunt Corpore Febres

“Textilibus si in Picturis, ostroq; rubenti

“Factaris, quàm si Plebeia in veste cubandum est.

“Quapropter quoniam nil nostro in Corpore Gaze

“Proficiunt, neque Nobilitas, neque Gloria Regni,

“Quod superest, Animo quoque nil Prodesse putandum.

*Pudeat eos, qui Christi Discipulos se esse
Profitentur, Magni æstimare Divitias Opero-*
F *siores,*

flores, & Fastuosam Gloriam huius Sæ-
 culi, & quæcunque *Populus Admiratur*, quæ
 flocci habuit *Lucretius*, *Tenebrarum Regno*
 deditum, miserum *Animalculum*. Quam
 Potens sit hæc Veritas, quæ vel ipsum *Per-*
vicit Lucretium, & quasi *Triumphatum* osten-
 tat! nempe Nil esse Omnia, quæ Absentia
 tanto Hiato appetunt, Præsentia tam Avi-
 do occupant Amplexu Avari, Ambitiosi,
 Lascivi! Scilicet, Lectores, cuicunque afful-
 sit aliquantula *Rectæ Rationis* Scintillula,
 necesse est ut celeberrimæ *Socratis* sententiæ
 acquiescat, qui Interrogatus, Quis Ditissi-
 mus esset, Respondit, ὁ Ἐλαχίστοις ἈρκέμενΘ.
 Αὐτάρεττα γὰρ οὐσέως δεῖ πλεονΘ. i. e. "Paucif-
 "simis contentus; nam Animus contentus
 "est Naturæ Opulentia, Contentum suis Rebus
 esse, inquit Cicero, maxima sunt, certissimaque
Divitiæ. *Christiani* igitur sunt *Ditissimi*, nam
 hic Sermo est non tantum Sancti *Pauli*, sed
 & omnium eorum, qui *Christum* sequuntur,
 Phil. 4. 11. Ἐγὼ ἐμαθὼν ἐν οἷς εἰμι Αὐτάρετος
 εἶναι. "Ego didici in quibus sum, iis ipsis
 "Contentus esse. Clarissime ostendunt *Sacra*
Proverbia, Plus Commodi accipere *Mites*
 in Minimis Rerum *Terrestrium*, quam hu-
 jus *Sæculi* Amatores in omnium Rerum
 istarum affluentibus Copiis, Prov. 15. 16;

17. "Melius est Parum cum Reverentiâ
 "Jehovæ, quàm Thesaurus amplius, ubi
 "est Vexatio. Melius est Cibarium ole-
 "ris ubi est dilectio, quàm Bovis faginati,
 "ubi est Odium. Ut clariùs appareat
 quanta sit *Sanctorum* Possessio Mente purâ
 & simplici, Illud Apostoli contemplemur,
 Rom. 8. 16, 17. "Et ipse Spiritus testa-
 "tur Spiritui nostro nos esse Filios DEI:
 "quod si Filii, etiam Hæredes: Hæredes
 "quidem DEI, Cohæredes autem *Christi*.
 "*Christus* autem Hæres Omnium, Hebr. 1. 2.
Christus est *Jehova*, de quo sic cecinit *Psal-*
mista, Ps. 24. 1. "Jehovæ est Terra &
 "quod implet eam, Orbis Habitabilis, &
 "Habitantes in eo. Hic Prædicat *Psal-*
mista tam Res, quàm Personas Omnes quo-
 dammodo *Possessionem* esse Omnium *Chri-*
stianorum, quod etiam ostendit *Apostolus*:
 "Sive Paulus, &c. Omnia Vestra sunt.
 "Cœli enarrant Gloriam DEI fortis, &
 "Opus manuum ejus indicat Expansum
 "eorum, Psal. 19. 1. Cum ipse DEUS
 sit Portio Nostra, quidni Cœli etiam, & illa
 quam Cœli enarrant, DEI Gloria accedant
 nobis in *Possessionem* Æternam? Si Gau-
 dens Popularibus Auris (ut *Virgilii* verbis utar)
 paticorum Hominum *Plausus* oblatus avidè

acciperet, in quantam Lætitiâ Christiano-
rum Exultent Pectora, quorum Gloriam Cœli
enarrant, quorum clarissima Encomia Om-
nes Angeli, imò & singulæ Creaturæ in
Cœlis, & in Terris resonant! Nostræ enim
sunt DEI Laudes, cum Portio Nostra sit
ipse DEUS Per Jesum Christum, Dominum
Nostrum. At, at! Impossibile est omnino
Magna, & Excelsa Christianorum Privilegia
Discernere, nisi FIDE, quæ per CHA-
RITATEM operatur, Mentis Oculo
affulgente, Per Spiritum Sanctum diffuso
(ut Magni Gregorii verbis utar) Terreni
Amoris Pulvere. Gestit Animus Ardentis-
simam Boetii Precationem recitare :

“ Da, Pater, Augustam Menti conscendere
Sedem,

“ Da Fontem lustrare Boni, Da Luce re-
pertâ

“ In Te conspicuos Animi desigere visus.

Fateor autem incredibili quâdam Dulce-
dine perfudisse mihi Animum plurima Stoi-
corum Dogmata, quæ Tenuēs quasi Umbrae
esse videntur Sapientia Cœlestis, quæ sola po-
test talia largiri Munera, quæ vocat Christus
(Luc. 16. 11.) Μακρον τὸ Ἀληθινόν. Quam
sit

fit clarum, & Augustum illud Axioma,
 "Οτι Μόνον ὁ Σόφον Πλάσει. *Animis Caele-*
stibus se miris modis Accommodant *Ay-*
riani, *Epicteti* Dogmata explicantis Scripta
 Egregia. Sic Ille stimulat, excitat, & ad
 ipsum DEUM contemplandum provocat
 Seghes, & Affectibus Terrenis immerfas
 miseras Animulas, L. 2. C. 16. ἴδε πῶς τρα-
 γωδία γίνεσθαι, ὅταν οἱ μωρῶς ἄνθρωποι πρὸς
 μάλα τυγχάνοντ' ἐμπέσῃ; πότε ἔν' Ἀθήνας πάλιν
 ὄψομαι, καὶ τὴν Ἀκρόπολιν; Τάλας, ἐκ Ἀρχῆς οἱ
 ἀ βλέπεις καθ' ἡμέραν; Κρηττόν τι ἔχεις, ἢ
 μείζον ἰδεῖν τῷ Ἠλίῳ, τῆς Σελήνης, ἢ Ἀστρον,
 τῆς Γῆς ὅλης, τῆς Θαλάσσης; οἷός δ' ἔστι Παρεκα-
 λεθῆν τῷ Διοικῶντι τὰ Ὅλα, καὶ κῆνον ἐν Σίσυ-
 τῷ περὶφέρειν. "Viden' ut Tragœdia oriatur,
 "cum res leves in stultos homines incide-
 "runt? Ah, quando Athenas, & Arcem
 "iterum videbo? Miser, non satis ea tibi
 "sunt, quæ quotidie vides? Potesne præ-
 "stantius aliquid videre aut majus Sole,
 "Lunâ, Stellis, Terrâ Universâ, Mari?
 "Quod si rem verè intelligas, etiam Univer-
 "sitatis Gubernatorem circumfers in teipso.
 O Bone Deus! Nostri Temporibus quàm
 rarò *Scintillat* illud in Operibus Christia-
 norum *Lumen Tuum*, quod adeo *Coruscat*
 in ipsis quorundam *Ethnicorum* Scriptis!

quàm Rarum hujusmodi Virtutis Exercitium! nempe Solem, Lunam, ac Stellæ Corporis, atque Animi oculis intuenso Superba Nobilium Tecta, & Splendida Ædificia Contemnere! Nec aliquid Magni æstimare, nisi sit ejusmodi, ut Possessorem sui Evehat ad DEUM! Nonne apud nos etiam auditur Vox ista, aut saltem *Praxis* spectatur Eidem congrua:

“ *O cives, cives, quærenda Pecunia primò est,*

“ *Virtus post Nummas—*

Nonne *Insanus* aliquis existimandus esset, si forsan audacter prædicaret, Volens nimirum Animi sui Bona aliis communicare, se adeo Solis, Lunæ, & Stellarum, Terræ Universæ, & Maris firmâ & integrâ Possessione gaudere, ut sibi quidem Isti videantur *Insaniam* Pessimam Insanire, qui Honores, & Opes, ob aliam rationem amplectuntur, quàm ut *Utantur* iis in Virtute exercendâ ad DEI Gloriam, & Hominum Solatium? Nonne etiam *Insania* stigmatè, Populo Judice, notandus esset, qui palam ostenderet se (cæteris paribus) *Panperes* potiùs quàm *Divites* (hos scilicet, qui sensu Vulgari tales appellantur) Cultu & Veneratione (quoad Actum

Actum Internum) prosequi? Verum erga *Pauperes* Amorem præcipuam esse *Charitatis*, seu *Virtutis Christianæ* Partem asseruit præstantissimus Theologus Sanctus Gr. Nazianzenus. “Hujus, inquit de *Charitate* loquens, *Præcipuam partem in eo sitam esse comperio, ut Pauperes Amore, & Benevolentia complectamur* (ταύτης κατὰ τὴν ἐκκλησίαν ἐκείνην) Heu Pietas! heu prisca Fides! Turpissimo obsequio nunc Mundo adblandiuntur quam plurimi eorum, qui verè *Christianos* se esse autumant. *Præcivam Pietatem quasi Obsoletam* Laudant, & Negligunt, nempe quasi Tempore suo Bonam, & Amabilem, quam verò jam Cedere oporteat prudentioribus consiliis: Jam nobis *Quærenda Pecunia* est, Honores ambiendi, Voluptates appetendæ. At, at! Veniet profecto cito pede, imò jam tantum non instat Tempus, quod palam ostendet non esse aliud Prudens Consilium, nisi illud ab ore *Martyris R. O. MANI* prolatum, quod his Verbis refert *Prudentius*:

“Contemne præsens Utile, o Prudens Homo,

“Quod terminandum, quod relinquendum est tibi.

“Omitte corpus rem sepulchri, & funeris,

“Tende ad futuram Gloriam, perge ad De-
um:

“Agnosce qui sis, Vince Mundum, & Sacu-
lum.

“Hæc autem est Victoria (ut testatur A-
postolus): *que vicit Mundum*, nempe
“FIDES Nostra, 1 Joh. 5. 4. Quis
inquam *Appetitu Intellectivo Sensibilia* ap-
peteret? quis unquam *Divina Particulam*
Aura Animum Immortalem rebus Caducis,
& Perituris explere tentaret, qui CREDIT,
hoc est, qui summâ animi Firmitu-
dine, ac Constantiâ apprehendit hoc Verum
esse, eo quod DEUS dixit, “Vitam No-
stram vapore esse ad exiguum tempus
“apparentem, & deinde disparentem,
Jacob. 4. 14. Quis unquam Fastuosam
Mundi Gloriam non sperneret Animitus,
& Despiciatui haberet, qui CREDIT hoc
Dogma Apostolicum, 1 Pet. 1. 24. “Om-
nis caro est ut Gramen, & omnis Gloria
“Hominis, ut Flos Graminis. Nec quis-
quam turpissimo Animi Morbo, Avaritiâ,
seu Anxiâ, & Morosâ habendi Cupidine la-
borabit, qui CREDIT Beatos esse *Mites*,
quoniam ipsi Possidebunt Terram. Ergo age,
o prudens Homo, erige Mentem, & CRE-
DE

DE Omnia, quæ Dixit DEUS per *Jesum Christum*, & *Apostolos* ejus. Hæreant tibi in imis medullis infixæ *Solomonis* verba, Prov. 16. 16. "Comparare Sapientiam ô
"quàm melius est Auro effosso, & compa-
"rare Prudentiam optatius Argento! Qua-
"lis sit illa Sapientia Sanctus *Jacobus* ostendit, C. 3. v. 17. "Sapientia, inquit, quæ è su-
"pernis est, Pura est, & plena Pacis, & Man-
"suetudo, & Obtemperans, & plena Miseri-
"cordiæ, & Fructuum Bonorum, & sine
"Diffidio est, & minimè simulata.

— "Ingenuas didicisse fideliter Artes
"Emollit Mores, nec sinit esse Feròs.

ut Ille cecinit. Placidos, Benignos reddit hominum Mores Sapientia, quæ à supernis est. *Mutes* audiunt *Sapientia Filii*, eò quòd Nemini invident, Bonos diligunt, Malis miserescent, ut *Spiritu Divino* adductus monuit *Boetius*, *Consol. Phil. L. 4.*

"Vis aptam meritis vicem referre,
"Dilige jure Bonos, & miseresce Malis.

Illi nimirum in summo dignitatis Fastigio
 collocati, nempe "Sublimi, & Elato, cujus
 "Nomen est Inhabitans Æternitatem, Isa.
 "17. 19. Per Christum Uniti *Infra se Vi-*
 "dent Omnia. Conculcant istiusmodi
 omnia quæ Invidiæ, Odii, Discordiæ Fomi-
 tem ministrant; quæ si Adsint, Tumidos
 reddunt *Multorum* Animos; si Absint, de-
 primunt eos Curarum pondere; sin Absint,
 Cupidine ardenti excruciant: Τὸ τοῦ
 Ἀνθρώπου τὸ τοῦ Δόξα, καὶ Μεγαλειότης, ut lo-
 quitur Sanctus *Basilius* Hom. de *Humilitate*,
 Ἀληθῶς γινῶναι τὸ Μεγα, καὶ τὸ τοῦ περσεύεσθαι, καὶ
 Δόξαν παρὰ τῆς κυρίου τῆς Δόξης ἐπὶζητῆν. "Hæc
 "est Hominis Sublimitas, hæc Gloria, &
 "Magnificencia, verè Cognoscere Hoc,
 "quod Magnum est, & Illi conglutinari, &
 "Gloriam à Domino Gloriæ quærere. Sci-
 licet Excelsos Animos, & Magnos gerunt,
 qui DEO Inhærent OPTIMO MA-
 XIMO. Nec quicquam Magnum est, ut
 Rectè quidem præclarus ille *Seneca*, nisi quod
 simul & Placidum, de Irâ L. 1. Speruamus
 itaque Res omnes caducas, & futes, seu
 potius Umbras, & Simulachra Rerum pro
 quibus litigant Mortales, certant, pug-
 nant, Igni, Ferroque sibi invicem minitan-
 tur. Sic Mites erimus & DEO similes,
 qui

qui *Charitas* est, & Auctor *PACIS*. *Legem*
Divinam, cujus *Completio* est *Charitas*,
 multo magis in deliciis habeamus, quàm
 Opum, Avari, aut Ambiciosi *Honorum* Cu-
 mulos, Cantantes jugiter cum *Psalmistâ*,
Seraphico Ardore Incensa Pectora pro Ho-
 locausto Numini offerentes, Ps. 19. 7, 8, 9,
 10. “*Doctrina* *Jehovæ* integra est, resti-
 “tuens *Animam*: *Testimonium* *Jehovæ*
 “verax, sapientiam asserens Imperito.
 “*Mandata* *Jehovæ* sunt recta, lætificantia
 “*Animum*: *Præceptum* *Jehovæ* purum,
 “*Illuminans* *Oculos*. *Reverentia* *Jehovæ*
 “*Munda*, consistens in sempiternum: Ju-
 “*dicia* *Jehovæ* sunt ipsa *Veritas*, *Iusta* sunt
 “*pariter*: *Desideratissima*, desiderabiliora
 “*Auro*, & quidem *Auro* *Purgatissimo* quam-
 “*plurimo*, ac *Dulciora* *Melle*, & quidem
 “*aceto* melle. Tum *Servum* tuum com-
 “*monefactum* istis in horum *Observatione*
 “*esse Emolumentum Magnum*. In horum
Observatione Emolumentum Magnum: nem-
 pe Qui Mundum spernunt, *Æternitatem*
 cogitant, *DEUM* amant, & *Proximum*
 per *Jesum Christum Dominum Nostrum*,
Fœlices Illi vel in hac *Vitâ*, licet (quoad
Externam *Homini*s *Conditionem*) *Turbidâ*
 sanè, ac *Molestâ*, magis magisque indies
 Gaude.

Gaudebunt. Et tandem Corporibus istis
Animos ad summam DEI OPT. MAX.
Fruitionem aspirantes Deprimentibus So-
luti, & Liberi (ut *Prudentii* verbis utar)

" Pulcherrimo Vita Statu

" In Arce lucebunt Patris.

Differ-

Differtatio Sexta.

Matth. 5. 8.

*Beati Mundi Corde, quoniam ipsi D E-
U M Videbunt.*

DE *Christianorum* in Terris vi-
vendi ratione hactenus :
restat ut de Vitâ eorum Fu-
turâ pauca proferamus. Per
hæc verba, D E U M Videbunt, Præ-
cipuè intelligenda est illa D E I Noti-
tia, non nisi in Coelis habenda, quam
Visionem Beatificam vocamus. Faxit
D E U S, ut quicquid Ego de Sublimi
hoc *Themate* dicturus sum, ejusmodi
sit, atq; ut talis sit etiam Meus, Vestri-
que, Lectores, Animi, ut Scripta Mea Me
pariter, ac Vos omnes ad Summam
SUMMI BONI Fruitionem conse-
quendam

quendam Cessantes excitet, Tardos impellat.

Per hanc *DEI Visionem* non tantum Intellectio seu *Animi Visio* intelligenda est, sed & ipsa *Visio Corporea*: nam post *Resurrectionem*, & hisce Oculis *Videbimus DEUM*, nempe **INCARNATUM**.

INFINITAM Potentiam, Sapientiam, Charitatem, Misericordiam, Justitiam, **ENS SIMPLICITER INFINITUM** Animo Videbimus Amantissimo ab ipso *Pulchro Infinito* Amati in *Æternum*. *Patre, Filio, Spiritu Sancto, Incomprehensibili TRI-UNO* Numine *Mysterii* Avitus Replebitur *Intellectus*; Qui sane Totâ suâ Capacitate Repletâ, *Patri Luminum* Simillimus, quodammodo *Actus Purus* evadet: nec amplius Ductet Voluntatem, sed ipsam *Simplicitatis* Divinæ *Ενέργεια* in se Recipiet, ut Idem futurum sit, **VIDERE**, ac **AMARE**, *Intelligere* ac *Frui*.
Sed

Sed reprimam me: Viâ magis trita
progredietur Oratio. Liquido constat
VISIONIS BEATIFICÆ ob-
jecta esse ea omnia, quæ Fecit DE-
US, Facit, Facturus est, Tot, tantasque
Creaturas è Nihilo Produciendo; Re-
dimendo, Sanctificando, Glorificando
HOMINES Credentes in *Jesusum*
Christum Dominum Nostrum: AN-
GELOS BONOS Stabiliendo in
Gloria Eternâ, MALOS ANGE-
LOS, atque *Homines* REDEMP-
TOREM Suum spernentes Suppliciis
DEO *Irato* Dignis Puniendo: Hac
lanè, atque alia hujusmodi Omnia clarè
adeo cognoscit, qui *Videt* DEUM, ut
nequeat *Intellectus* ejus aliquam cla-
rius eadem Cognoscendi *Appetitionem*
excitare: Et per ipsam in CHRISTO
cum DEO *Unionem* SUA esse
Sentit UNIVERSA.

O præclarum Diem, cum nos omnes
(qui summo scientiæ desiderio flagran-
tes, post tot labores nocte, dieque

Chartis

Chartis Impallescendo exantlatos tenuem solummodo, & exilem, & tantum non nullam Rerum Naturalium cognitionem assequimur) Totam NATURÆ Fabricam penitus Inspiciemus, Gloriosissimā CONDITORIS Sapientiā ab Inspectis *Rebus*, ac *Eventis* omnibus in Nos Reflexā in Æternum Splendentes! Cogitantes ista, Eruditi Lectores, dum Philosophorum *Ethnicorum*, aut *Christianorum* Scripta revolvimus, Caveamus usque, ne *Verisimilitudini*, seu potius *Veritatis Umbra* Inhiantes *Substantiam ipsam Veritatis*, DEUM amittamus: scilicet eò usque tantum *Verum* Quærendum est, quo nobis Auxilii quicquam exhibeat in *Summum Bonum* consequendum. Quicquid id est, quod *Mali* Homines acquisitam sibi *Veritatem* esse autumant, minimè profectò meretur illud *Veritatis* Nomen: nam *Lux* sanè est omnis *Veritas*, quæ *Opera Tenebrarum* minimè comitatur.

Itaque,

Itaque, *Scholastici*, *Stolidos*, & *Ineptissimos* esse existimemus *Eos*, qui *Philosophiam*, seu *scientiæ studium* præferunt, sed tamen *Nituntur* (ut *Lucretii* verbis utar)

— *Constante labore*

*Ad summas emergere Opes, rerum-
que potiri,*

Atque interim Cœlestia, Æterna Negli-
gunt. Rixas iniquissimas ab omni
Charitate alienas istiusmodi viros in
se invicem excitare, qui *Veritatis* Cau-
sam Defendendam in se recipere pro-
fitentur, Extremæ esse Dementiæ quis
unquam sanus negaverit? Qui Corda
sua *Charitate* replendo *Mundare* ni-
tuntur, ut: DEUM tandem *Videre*
poterint, his solis Placet VERI-
TAS; aliis *Scientiæ studium* præ-
ferentibus *Opinio* tantum, & *Qs Po-*
puli. Rerum Naturalium Essentias
Rite Inspicere est Amare DEUM,
G Essenti-

Essentiarum Omnium Fontem, & Originem, Quem *Amar* nemo, nisi per *Fidem* Redemptoris Evangelio adhibitam: quæ *Fides* DEUM Nos in ipso Redemptore *Jesu Christo* Amantem in hac vitâ Δι' Εὐαγγελίου ἐν Αἰνίγματι (ut loquitur *Apostolus*) Cernendum exhibet, ut magis, magisque indies Diligamus Eum, quò tandem in Cœlum emigrantes, ipsum *Patrem Omnipotentem Cœli ac Terræ Creatorem Faciæ ad Faciæ* in *Æternum Videamus*, In Eo Profunda omnia *Incarnati DEI* omnes Peccatores, Turpissima Animalcula, *Diaboli* Servulos per summum Amorem suo sanguine Redimentis, Mysteria clarissimè cernentes. O præclarum Diem, cum Decreta *DEI* de *Electiōe*, ac *Reprobatione*, de quibus dum rigidis, & acerbis Animis *Litigant* potius, quàm *Disputant* Mortales, Certò, ac Indubiè se reddunt *Iræ Divinæ* obnoxios, Sententias Dubias, aut Fal-

fas Invidè, & Arroganter pro Certi^s
jactantes, cum, inquam, Decreta illa
nobis Innotescant sub Universis Rati-
onibus quibus jam Constat Beatiss. Cae-
lorum Incolis esse illa *Infinite Ama-
tore* Digna.

Huc usque progredienti mihi Ani-
mus profundâ Admiratione Absorptus
Calamum excussit. Apage Sermionem
omnem de Re non Enarrabili ! Faxit
DEUS ut Vita Mea Me Ostendat
summâ Cupiditate ardentem VI-
SIONIS BEATIFICÆ con-
sequendæ, quam minimè possim
Verbis Ostendere. Vale Lector, &
Mecum semper Æternitatem Cogita:
DEUM Spira.



G 4

Pfal-

PSALMUS 19.

ENarrant COELI Cælestis No-
mina Regis

Splendida : & Astriferos excurrit
Clara per Orbes

Fama CREATORIS. ² Lux Lucæ
magna revelat

Arcana, & Nocti reboans Nox præ-
dicat ipsa

Prudens Consilium. ³ Non est Gens
ulla, nec usquam

Lingua, ubi Vox horum populi non
perculit aures.

⁴ Terræ Circuitum totum complectitur
horum

Linea : & extremum sonnerunt verba
per Orbem :

Immensum Solis spatium currentis
in illis

Constituit. ⁵ Sponso, Thalamum cum
mane relinquit,

Hic Similis prodit : Gaudet quasi
fortis aperto Vir

*Vir Campo properans, dum captat præ-
mia Cursu.*

*6 Cælorum Fines linquit, properatque
relictos*

*Visere, Ubique suum spargens Hæc
Flamma calorem.*

*7 Perfectæ DOMINI Leges, &
pectora vertunt*

*Obliqua: imo Animos DOMINI
Mandata Sagaci*

*Simplicitate beant. 8 DOMINI
Præcepta tenore*

*Recto Corda fovent: DOMINI
Purissima Scita*

*Dant oculis Lumen. 9 DOMINI
Reverentia munda est,*

*Æternūque manet: DOMINI
Decreta coherent*

*Summe Justitiæ. 10 Multo cupienda
magis quàm*

*Aurum, quàm clarum, quod fulsit in
Ignibus, Aurum:*

*Et superant dulci dulcissima mella
Sapore:*

11 Illa

¹¹ Illa tuum, ut rectè faciat, munere
Ministrum :

Illam etiam rectè facienti præmia red-
dunt.

¹² Non, totam scelerum illuviem quis
cernere possit

Qua mens spurcata est ! maculas
absterge refusas

Intus, & occultas. ¹³ Nè totis viri-
bus ipse

Peccatis inhiat, Seruum cohibeto :
Libido

Nè premet imperio miserum : Tunc
purus, & insons

Effugiam penitus sceleris consortia
Magni.

¹⁴ Oris Verba mei, Cordis Meditatio
tota

Candorem superent Vero Candore Ni-
valem,

Te Spectante, D E U S, Mea Rupes,
Vita, Redemptor.

ΔΟΞΑ ἐν ὑψίστοις Θεῷ, ὁμῶς Ἰησὺ Χρῴστῳ,
ἐν Ἀρχαῖς αἰώνων. Εὐδοκία.

PSALMUS 23.

¹ **E**ST DOMINUS Mibi Pastor:
 Opus nihil ipse requiro.
² Quo Custode sitim dulci restingue-
 re rivo.

Me Juvet, & viridi fessum requie-
 scere in Herbâ.

³ Ille Animam mæstam refovens mi-
 hi Tramite Recto

Dirigit Æterni summa ad Fastigia
 Cæli :

Hoc facit ipse Sui Causâ. ⁴ Si Mortis
 Imago

Obversata oculis horrendam præjicit
 Umbram

Ante pedes, gradiar fortis, vacuusque
 Timoris.

Virga Tua, & Baculus mihi sunt So-
 latia Tecum

Degenti. ⁵ Immensis Dapibus, Spe-
 cante Inimico,

Me

(92)

*Me reficis : tingens Oleo Caput, am-
pla ministras*

*Pocula. & Sic Tua Me Clementia
summa sequetur.*

*Semper : & usque Tui completar
limina Templi.*

HALLELUIA.

FINIS.
